

東
華
續
錄

東華續錄

臣周澐稽首恭校

秋七月甲戌命纂平定準噶爾方略○丁丑諭軍機大臣等前班第等屢次密奏阿睦爾撒納負恩狂悖斷難姑容是以特降諭旨令其密行擒治今阿睦爾撒納復欲速來入覲語屬可疑未必出於至誠特因所行非理懼班第等擒治因而多方逞其狡獪是其言雖可聽實無欲來之心或行至中途託病遷延或至塔爾巴哈台遊牧依戀久居均未可定夫以阿睦爾撒納如此奸宄狂悖豈僅降旨開導所能了事若不將伊擒治又何如置之不問今伊惡迹已顯著如此班第等不思密爲辦理但稱請朕面加訓諭以折其心是全不知事理之輕重矣著速行密諭如此際奉到前月二

十八日所降之旨已將阿睦爾撒納擒治甚善若未及辦理而伊
已起程前來班第等接到此旨約計阿睦爾撒納行程未遠卽遣
人將伊追回擒治如已逾旬日之外亦須沿途詳密偵探消息再
行辦理朕意阿睦爾撒納至塔爾巴哈台必詭言防範哈薩克遷
延不進班第等應卽以會同防範哈薩克爲詞著薩喇爾鄂容安
帶領所留兵五百名及達什達瓦屬下兵聲言會合速行趕赴擒
治設伊行至中途託病逗遛伏竄他處不便遣兵擒拏亦著班第
等酌量設法妥辦總之阿睦爾撒納逆迹已著不可姑容以致貽
患將來然路途遼遠班第等須盡心籌畫乘時決策毋得稍自委
靡致失機宜再額琳沁多爾濟不過一小有才之人未經更事一
切密要之語且勿令與聞將此一併傳諭班第等知之○戊寅班
第奏杜爾伯特台吉伯什阿噶什等來降遣伊弟肯哲畢喀入覲

報聞○己卯諭朕時巡江浙已屢降旨令該督撫等毋事浮靡務從簡樸並飭禁一切商捐陋習乃聞前次南巡時浙省辦差至有當商捐費者此斷不可著再行曉諭嚴加禁止朕清蹕所經觀民問俗關政治之大端卽動用數十萬正帑亦何不可而必取給於捐項乎該督撫等宜仰承德意撫恤黔黎苟徒以鋪張華麗炫溷耳目至派累各商鋪戶使不肖胥役乘機滋擾侵肥是以惠民之典而轉以累民豈朕巡幸本意亦豈所以慰兆庶望幸之忱耶若仍出此朕惟引以爲戒不當俯從所請矣如西湖中船隻自皇太后及朕御用一二舟外其隨侍人等原可各載小艇毋庸多備船座以滋糜費再所過城市民居因迎候鑾輿各出誠敬之意於其門前香鐙懸綵者自可不禁其行宮陳列玩器蘇揚城郭衢術閒張設棚幔已有旨禁飭至沿途水次從前俱設鐙船戲船臺閣

俚俗遊玩之具此不過地方吏役及民間游手好事之徒藉名苛斂尤當通行嚴禁該督撫等其懷遵無忽○癸未予故禮部右侍郎嵩壽祭○乙酉諭軍機大臣等據班第等密奏阿睦爾撒納將所賞黃帶孔雀翎置而不用並不將已經內附受恩之處告知厄魯特人眾等語阿睦爾撒納種種悖逆斷不可留朕屢經降旨密諭班第等遵辦今覽班第等所奏阿睦爾撒納不惟不知感激朕恩且將內附受恩之處欺瞞厄魯特人眾卽此一節應卽明正典刑其餘悖逆之事更無足問矣班第等如奉到前月二十八日所降諭旨已將阿睦爾撒納擒治甚屬妥協如尙未辦理伊已起程前來朕必將伊拏問班第等諸事宜密之又密不得稍有漏洩○丁亥諭阿蘭泰自出兵以來奮勉效力擒獲達瓦齊實屬可嘉著加恩賞給世襲男爵○諭軍機大臣等據班第等密奏阿睦爾撒

納阻止班珠爾等前來入覲又班珠爾倚藉勢力將並非伊舊日屬人歸併管轄經班第等駁回等語阿睦爾撒納種種悖逆深負朕恩屢降諭旨令班第等遵辦今閱此奏阿睦爾撒納欲留班珠爾齊木庫爾等在彼不令前來入覲明係欲留其黨以增羽翼其叛逆愈著班第等如遵前月二十八日所降諭旨已行擒治固屬甚善若伊已起程至塔爾巴哈台游牧地方借防禦哈薩克之名逗遛不前亦遵前旨著薩喇爾鄂容安帶領兵丁以會同防範爲詞將伊擒治儻阿睦爾撒納尙未至伊游牧中途遷延班第等卽以奉旨會商事件追伊回至軍營辦理如不遵旨前來卽著班第等帶兵追擒先將通哈薩克路徑派兵堵禦使其不致免脫方爲妥協再前經降旨令伊等辦理阿睦爾撒納時將齊木庫爾納噶察等一併查拏今查班珠爾亦係其黨伊二人乃同母異父之子

自必同謀班珠爾亦應一併治罪但伊已於二十九日隨同阿蘭泰來京途中尙可稍緩俟伊至熱河另行辦理班第等此次力折阿睦爾撒納阻止班珠爾之議薩喇爾卽將諾海奇齊克等派出防禦不令阿睦爾撒納得逞奸謀甚屬可嘉班第薩喇爾鄂容安務宜加意奮勉和衷集事庶不負朕委任至意○壬辰停河東轉運倉豆○癸巳諭軍機大臣等班第等密奏達瓦齊牲隻什物阿睦爾撒納薩喇爾皆私自掠取彼此不相和協等語班第等以此事陳奏全未知朕用人之意阿睦爾撒納薩喇爾皆係厄魯特貪婪性成若使阿睦爾撒納無悖逆之迹不過貪取財物原可毋庸深究至薩喇爾更係厄魯特屬人歸順已久受恩甚厚諒伊必不至有僭妄狂悖之事若因此等小事疑而不用何以收羣策之力卽以掠取牲隻什物而論朕知薩喇爾必不至如阿睦爾撒納之

甚見在班第鄂容安會同薩喇爾辦理緊要事務若過於疑心使伊知覺轉屬無益班第等惟當開誠相示據理阻止薩喇爾自必聽從若亦如阿睦爾撒納之多方防範使伊畏懼或致激成事端關係匪細况薩喇爾不過暫住伊犁一二年並非令其長久任事之人此時無庸過於苛求班第等務宜善體朕意公同籌畫以副朕委任○丙申諭軍機大臣等班第等將阿睦爾撒納遣納噶察帶兵前往招服葉爾羌喀什噶爾回子又欲借防備哈薩克爲名不行前來入覲並欲令齊木庫爾居住塔爾巴哈台地方各情形密行陳奏觀此則阿睦爾撒納乖張悖逆之迹益屬顯著無疑朕前所降諭旨伊豈肯傾心折服是阿睦爾撒納斷難姑容但恐伊至塔爾巴哈台地方託故久居不肯前進耳如伊仍未起程班第等遵奉二十八日所降諭旨業經辦理甚善儻未及辦理伊已起

程前來則應將伊依戀塔爾巴哈台之處先行加意體察最爲緊要班第等一經探得確信則此旨一到卽遵朕前諭將阿睦爾撒納調回完結後仍卽遵旨帶兵速赴塔爾巴哈台將伊親屬信用之人一併擒拏如阿睦爾撒納中途別無留戀徑行前來班第等得信亦卽速行密奏俟降旨辦理仍酌量日期再降旨與班第等俟奉到之日一面派兵星赴塔爾巴哈台辦理此際惟宜密之益密毋使稍有洩漏○丁酉班第奏準噶爾各宰桑來降達瓦齊所屬應作爲公中屬下將爲首宰桑授三品總管內有恩賞散秩大臣副都統銜者仍兼總管之任戶口三千以上授內大臣一千以上授散秩大臣一千以下授三品總管一百以上授四品總管再伊等進貢之例酌議裁減其供膳喇嘛照舊辦理下軍機大臣議奏尋議來降宰桑五十二人內俄羅斯殺舊宰桑奇塔特率四千

餘戶來降所率非其屬下應授散秩大臣巴蘇泰糾合博托什率
九百餘戶來降亦應授三品總管賽音察克率一百五十餘戶來
降已授副總管其職銜仍俟 欽定餘應如所奏得旨所有準噶
爾舊有之四圖什墨勒鄂勒哲依約蘇圖阿巴噶斯俱著授爲內
大臣其袞布所遺之缺俟選人補授亦著授爲內大臣賽音察克
仍授爲副總管餘依議○己亥命江蘇截留漕糧十五萬石備賑
○辛丑諭軍機大臣等班第等密奏阿睦爾撒納種種逆蹟圖據
準噶爾地方及促令起行後次日卽行住宿復遣納噶察告稱阿
巴噶斯約蘇圖烏克圖與喇嘛等潛行計議如不合阿睦爾撒納
統領駐紮伊等甯剖腹而死不得貪生別事他人等語阿睦爾撒
納叛逆已彰辦理自不容猶豫昨據奏阿睦爾撒納已於初十日
起行朕意方謂就此辦理甚屬便易但據班第今日所奏則似阿

睦爾撒納意中已不無猜疑朕心深爲慮念乃班第等奏稱或俟伊至熱河時酌量辦理或令於熱河附近及呼倫貝爾等處居住所言參差不定是全不知事理之輕重矣試思見在事勢至此朕卽有姑留阿睦爾撒納之意伊等俱係目擊情形理當據實陳奏無所遲回而乃二三其說不能果斷若此朕甚不取再如阿睦爾撒納故令納噶察來述阿巴噶斯等之言彼時如何相答亦未奏及又稱將約蘇圖等業行調取等語夫阿睦爾撒納遣回納噶察逞其誕妄之詞明係試探伊等使識見明敏之人卽當向納噶察云阿睦爾撒納與我等同爲將軍伊之前去卽如我等前去我等在此亦卽如伊在此宰桑等何敢作此妄語果其有之卽應向阿睦爾撒納查問如此詰責不但當下情詞可以洞悉卽伊回告阿睦爾撒納時亦可款慰其心今旣不出此恐阿睦爾撒納不能不

生疑畏再達什達瓦之妻告稱阿睦爾撒納欲娶其女協力相助
即可收服四衛拉特之語似覺荒唐以阿睦爾撒納之人之行此
言在所必有但今日安肯輕吐使薩喇爾聞之能保其不爲傳述
乎伊卽有此言班第等惟應密加防範而仍示以不疑乃告以將
此情節具奏殊非慎密之道今此事旣往無庸置議此間相距甚
遠一切事宜班第等務宜相機籌辦勿致稍有貽誤再觀阿睦爾
撒納欲前復卻情形其意詎肯徑行前來班第等此時如遵朕前
旨將伊業已擒治固甚妥協如未及辦理而伊已起程前來勢必
在塔爾巴哈台游牧處逗遛班第等加意探訪一得信息卽遵朕
屢次所降諭旨務期熟籌妥辦一舉萬全無少疏漏慎之

八月丁未 上奉 皇太后啓鑾秋獮木蘭○戊申免經過地方
額賦十分之三○己酉諭軍機大臣等班第等奏稱奉到六月二

十八日諭旨時阿睦爾撒納業與額琳沁多爾濟同行又有各處撤回兵丁在後阿睦爾撒納自必前來入覲等語阿睦爾撒納果來至熱河辦理自易且將伊罪惡暴白於新來投誠人等亦可以快眾心而彰國法但伊甫經起程即有人指其罪狀紛紛告訐伊豈不聞風畏懼且伊自揣所爲必不敢前來入覲雖已起程或沿途託故戀住遊牧事所必至伊見在已抵何處摺內未經奏明前會諭及起程若尚在十日以內即行擒治此時會否辦理所當加意慎密如尚未辦理見在雖有攻擊阿睦爾撒納之人且陽爲解勸置之不問切勿令其知覺致生他變至阿巴噶斯誕妄情形顯與同惡今伊忽告薩喇爾云從前隨阿睦爾撒納行走未得在將軍前效力等語前經班第等調取阿巴噶斯等前來此時果遵調前來與否摺內亦未明晰又管理伊犁渡口回目鄂斯瑞伯克來

訴阿睦爾撒納強取其牲隻口糧俟辦伊遊牧後酌量給還卽不敷抵補料擒治阿睦爾撒納後眾心已快亦可無庸補給再所奏塔爾巴哈沁台吉額琳沁由哈薩克逃回見住博囉塔拉與阿睦爾撒納同族而有宿嫌今雖攀援內附中心必不相合俟來見時加意體察自可得哈薩克與巴特瑪車凌信息等語班第等或令額琳沁前來入覲或酌量安插原遊牧處公同酌定卽行奏聞至薩喇爾於阿睦爾撒納之姊來見時察其醉語甚屬留心但婦女言詞不足深究卽如阿巴噶斯等亦不過趨附勢力勉強脅從之人若槩行窮治則各部未免生疑但阿睦爾撒納既有令伊姊子沙津巴圖管領達什達瓦戶口協力同助之語將來或卽將沙津巴圖安插於察哈爾地方若沙津巴圖尙無異心亦不必安插將此傳諭班第等俟辦理阿睦爾撒納後卽遵旨辦理○辛亥命江

蘇再行截留漕糧十五萬石備賑○壬子 上奉 皇太后駐蹕

避暑山莊○甲寅諭軍機大臣等班第等奏杜爾伯特台吉伯什
阿噶什告稱從前古爾班和卓聞大兵平定伊犁原與哈薩克計
議歸附續因阿睦爾撒納遣使到彼哈薩克復有出兵信息請遣
兵相助以爲聲援班第等遂派侍衛章武宰桑博第前鋒阿喇勒
拜等前往等語看此情形明係阿睦爾撒納陰相煽誘卽如阿巴
噶斯等亦皆受其籠絡今但將阿睦爾撒納擒治弊端卽可永弭
朕意阿睦爾撒納此時必逗遛於游牧地方班第等卽遣人往追
伊必不遵行惟遵照前旨卽令薩喇爾鄂容安領兵至塔爾巴哈
台將伊擒治方爲妥協如伊果前來入覲則俟伊到熱河時辦理
固甚易也從前遣使至哈薩克時阿睦爾撒納必令伊屬下人前
往其中顯有詭計曾降旨將伊所遣之人訊問班第等如業將阿

睦爾撒納擒治卽嚴拏阿睦爾撒納遣往哈薩克之人訊明切實
供詞具奏再班第曾奏訪得阿睦爾撒納與阿巴噶斯等竟夜屏
人密語而納噶察傳說阿巴噶斯誕妄之言有若不令阿睦爾撒
納統率準噶爾伊等惟有剖腹而死等語乃阿巴噶斯又向薩喇
爾告稱有被阿睦爾撒納留住不得在將軍前效力之語如班第
等訪問屬實則伊等有心同謀罪在不赦如阿巴噶斯向薩喇爾
之言果係實情則是第爲阿睦爾撒納威力脅制情尙可原班第
等應加意體察不可受其欺給亦不得過於疑慮且似阿巴噶斯
之人亦必不一而足若辦理阿睦爾撒納後一一根究則以一人
而株連眾人新降人眾必生疑懼於事無益班第等務宜斟酌辦
理今所慮者阿睦爾撒納或乘閒逃入哈薩克亦未可定如果逃
往班第等卽遵朕前旨遣人曉諭哈薩克務必令其擒獻儻不遵

行則以兵力進取見在阿睦爾撒納行至何處及於何處逗遛摺
內並未聲明著卽速查明具奏至此次投誠之台吉宰桑等朕俱
酌量加恩賞給爵秩伯什阿噶什將哈薩克情形詳悉告知其輸
誠更屬可嘉且係準部大台吉著加恩封爲親王前鋒阿喇勒拜
亦屬奮勉著賞給藍翎伊等前往招服古爾班和卓後卽將情形
奏聞○乙卯諭軍機大臣等班第奏遵旨行令阿睦爾撒納回至
軍營適伊從前遣往哈薩克之丹津與來使同至詞頗恭順未便
遽將阿睦爾撒納調回致生事端遂卽停止追回等語所辦尙合
機宜但哈薩克來使阿穆爾巴圖魯旣懇入覲班第等卽應明白
曉諭以阿布賚誠心款附恭順可嘉我等卽奏聞大皇帝令爾等
隨阿睦爾撒納一同入覲如此伊等旣知內地將軍權柄所在而
阿睦爾撒納亦難於阻止今將來使遣回聽阿睦爾撒納定議恐

伊未必遣令前來在阿睦爾撒納初不願哈薩克來使恭請入覲而又難於禁止是以令往班第處定議今班第仍交阿睦爾撒納辦理是則墮其術中殊未允協嗣後哈薩克如再遣使前來卽徑送入京至阿睦爾撒納之兄普爾普宰桑烏巴什及在逃之固穆扎布等或隨伊入覲或留匿伊游牧處俱應分別辦理惟業克明安之德濟特察表初降時頗屬安靜後漸驕縱貪饕此特附和阿睦爾撒納之人班第等宜詳察情形相機辦理又所奏善披領集賽之尼爾巴喇嘛密告阿睦爾撒納使伊等保留駐紮不願入覲伊等未經允從又告其暗結各宰桑遣回游牧情事甚屬可嘉著卽授爲大喇嘛明年令其前來入覲見在章武阿喇勒拜等協同伯什阿噶什招撫哈薩克可卽將哈薩克見在遣使前來之處曉示伯什阿噶什等伊等抵哈薩克邊境時毋得搶掠生釁惟加意

防守卽伊部落有兵侵軼亦先以理論令其撤回如不遵再爲擒
勦仍將招撫哈薩克情形陸續奏聞○丁巳 上奉 皇太后自
避暑山莊巡幸木蘭行圍○庚申諭軍機大臣等朕明歲南巡一
切應行籌辦事宜該督尹繼善前請於河防秋汛事畢來京面聆
訓旨今該督見在高寶一帶查勘河工朕亦欲俟其來京面加訓
諭但若俟朕回京陛見則伊回抵江南尙需時日恐辦理不能裕
如朕自木蘭回鑾約計九月二十日前可抵熱河彼時正當筵宴
準噶爾諸台吉之際尹繼善值此嘉會不可不躬逢其盛且便於
商略事宜著傳諭該督令其徑赴熱河同入筵宴尹繼善厚重有
體在滿洲大臣中可壯觀瞻使外藩見之亦足增色也○諭朕前
降諭旨俟辦理阿睦爾撒納後若將同黨之德濟特察衮阿巴噶
斯察哈什等盡行擒治恐準噶爾各部妄生疑懼此中若有實係

脅從非其本心者卽不必辦理又如阿睦爾撒納之兄普爾普扎木參齊木庫爾其俱應擒治與否班第等宜悉心體察據實奏聞再阿睦爾撒納之塔爾巴哈台遊牧人眾朕意與其分給眾人不若令喀喇巴圖魯阿玉錫管領再擇一協同管領之人在扎布堪等處居住亦可仍傳示伊遊牧以阿睦爾撒納負恩悖逆斷不可留罪止其身與眾無與特不忍伊等離散派出大員管理似此辦理事後可不致別生事端與否班第鄂容安見在彼處薩喇爾深知伊等情形著卽公會商具奏○辛酉命準部王公扎薩克等照內地扎薩克一體給俸○命準部歸公管轄之二十一昂吉分立八旗仍准存舊日名號○癸亥賞準部貧戶官茶

九月壬申朔諭軍機大臣等班第等奏阿睦爾撒納前遣得木齊特古斯孟克前往古爾班和卓及西部哈薩克今與伊等使人同

至據伊等來文及使人所告請將塔什干城內向日駐紮回人阿奇木一員厄魯特哈爾罕一員不必駐紮查此係策妄阿喇布坦時相沿舊制今請裁去是有據占塔什干之意因示以不便准行令其齎捧頒諭哈薩克敕書與前遣之侍衛章武等同往招撫仍令伯什阿噶什之兵沿途防護等語所辦尙合機宜惟哈薩克來文內有聞阿睦爾撒納仍居舊游牧甚爲喜悅可復覩噶爾丹策零之時等語此必係阿睦爾撒納隱諱投降受恩之事但以借兵復仇並總統準部爲詞從前因阿睦爾撒納離軍營未遠詰問恐致洩漏今已歷多時自當詳詢特古斯孟克將阿睦爾撒納遣伊前往時有何言語明白供出班第等未將會否詰問之處陳奏殊屬含糊此時特古斯孟克如尙未遣回阿睦爾撒納處卽詳悉詢問具奏再古爾班和卓來文內稱前避達瓦齊之鋒逃往彼處今

欲來歸恐遇舊日仇人相害乞爲保護並恐哈薩克布魯特邀截等語伊若能親身前來受其歸順則可若必須救助至與哈薩克等構兵將來羣起效尤必無休息斷然不可著傳諭班第等知之○甲戌喀爾喀親王額琳沁多爾濟奏八月十九日至烏隴古地方阿睦爾撒納將印信交臣告稱先至遊牧再行入覲次日阿睦爾撒納從額爾齊斯地方逃去沿途搶掠臣卽揀選索倫兵二百名喀爾喀兵一百名起程追逐諭軍機大臣等額琳沁多爾濟奏阿睦爾撒納逃遁情形甚屬含糊阿睦爾撒納旣未逗遛於塔爾巴哈台遊牧業已前進離其妻子遊牧處不遠何以不挈之同行或搶掠喀爾喀再圖竄逸乃顯將印信交出忽爾遁去此中情形叵測相距甚遠難以揣度著將額琳沁多爾濟奏摺鈔寄班第等閱看從前伊奏阿睦爾撒納情事朕已節次降旨訓諭此時班第

等若得伊逋逃信息卽遵照前旨相機辦理仍將所得信息及如何辦理之處卽速奏聞○乙亥諭軍機大臣等據莫爾渾等奏稱貝勒齊木庫爾普爾普貝子德濟特克什克台吉鄂爾參等將阿睦爾撒納私遣至遊牧之們都及二僕人拏獲詢知阿睦爾撒納通信遊牧人等先行起程伊卽從阿爾台一路來迎等語昨額琳沁多爾濟奏報阿睦爾撒納中途逃遁甚屬含糊朕尙未深信今伊私遣屬人通信遊牧以冀潛逃種種逆蹟俱已敗露實爲深負朕恩齊木庫爾普爾普等不顧弟兄私情將伊所遣之人拏獲送到深明大義實可嘉子齊木庫爾等所屬戶口仍令伊等自行管轄俟擒治阿睦爾撒納後卽將阿睦爾撒納戶口產業分別賞給伊等以示鼓勵仍俟來京入覲另行加恩著傳諭阿蘭泰等降旨曉諭伊等知之○丙子諭據永常奏稱阿巴噶斯哈丹等將西路

臺站搶掠奪取官茶等語前班第等將阿巴噶斯哈丹等與阿睦爾撒納互結黨援謀爲不軌情事曾經奏聞昨額琳沁多爾濟又奏阿睦爾撒納於中途逃遁伊已帶兵追逐今阿巴噶斯等搶掠臺站官物則伊等黨惡爲奸迹已彰著阿睦爾撒納受朕厚恩喪盡天良謀爲叛逆實天理人情所不容必應擒獲治罪永常此次辦理尙屬勇往接到此旨卽將索倫兵調回帶領前進其各隊撤回兵丁如有應調者亦卽就近調取彼處見有馬七千餘匹酌量調用策楞三格等帶領駐防滿洲兵一千名奮勇前進或應剿除或應安撫公同妥協辦理如有必須留待之處占據形勢以待後隊兵至併力進剿見在噶勒藏多爾濟等俱赴熱河入覲恐阿逆捏造妄言煽惑伊等遊牧人眾特命噶勒藏多爾濟沙克都爾曼濟巴雅爾等寄信曉諭伊等遊牧人眾由驛遞寄永常接到日卽

委員遞交伊等遊牧再伊等已派出各宰桑等令玉保帶同馳赴軍營噶勒藏多爾濟等亦不日卽令其回至遊牧一切應行辦理事宜已降旨與玉保俟伊到時永常策楞等會同詳細商酌籌辦永常仍著辦理定西將軍事務策楞玉保扎拉豐阿俱著在參贊大臣上行走○命江蘇再截留漕糧二十萬石並搬運河南粟麥二十萬石備賑○丁丑諭軍機大臣等阿蘭泰奏稱已將阿睦爾撒納妻子及班珠爾等收獲派侍衛富廉等解送來京並派兵將伊遊牧人眾遷至塔密爾等處等語阿睦爾撒納妻子等卽飭侍衛等中途小心管解速行來京至伊等所奏阿睦爾撒納之妻並不聽從潛逃此特見我兵已至無可逃遁故爲此飾詞豈可憑信如果誠心不肯潛逃則阿逆之詭計伊妻早已聞知何不先行陳訴著將此情節另行詳悉具奏阿逆遊牧人眾不特不宜仍在原

處居住卽遷至塔密爾鄂爾坤等處尙屬未協從前曾令查勘通
肯呼裕爾地方爲安置伊等遊牧之地卽著哈達哈阿蘭泰等將
阿逆遊牧人眾馬駝器械盡行收取惟留口糧羊隻派出兵丁嚴
行防護移至通肯呼裕爾安置俟齊木庫爾等入覲後察其情形
卽將阿睦爾撒納人等命其管轄所獲阿逆遣回遊牧之們都等
審訊明白卽在彼處正法或於烏里雅蘇台地方嚴行看守俟擒
獲阿逆時一同獻俘阿蘭泰等見將滿洲索倫兵丁暫在扎布堪
駐紮俟遊牧遷定後令在庫克嶺那木嶺二處防守此項兵丁與
其在彼二處防守不若接應額琳沁多爾濟併力前進更爲有益
然或相離已遠或馬力不足著阿蘭泰等查明奏聞阿逆逃竄後
額琳沁多爾濟卽領兵前進擒獲自易且伊屬下人怨恨者多心
已離散阿蘭泰等應遣人知會額琳沁多爾濟設法曉諭阿逆所

屬人等令其自行擒獻永受重恩卽屬下人等必自內生變逸賊更易弋獲將此詳悉傳諭阿蘭泰等遵照辦理○諭阿睦爾撒納包蓄異志敢爲逆亂實由和托輝特郡王青滾雜卜逢迎慫慂所致又承阿逆風旨將派出入覲之諾爾布丹津帶往烏梁海地方情罪斷難寬宥著傳諭哈達哈將青滾雜卜從容令至軍營卽拏解來京並曉諭和托輝特人眾青滾雜卜獲罪擒治與爾等無涉青滾雜卜原係貝勒因著微勞晉封郡王今旣獲罪理應削其貝勒朕姑念伊祖勳勞著加恩將貝勒令伊子承襲諾爾布丹津如仍在青滾雜卜處或去尙未遠一併拏解送京如去已甚遠卽可不必○諭據阿蘭泰奏扎薩克林丕勒多爾濟等爲阿睦爾撒納所困伊等各發矢突圍而出旋遇阿睦爾撒納輜重奪取白蠟盛纓等物等語林丕勒多爾濟等奮勇可嘉速行送至熱河其兵丁

等各賞銀二十兩以示獎勵著傳諭哈達哈等知之○己卯諭軍機大臣等永常奏阿巴噶斯哈丹帶兵搶掠扎那噶爾布遊牧扎那噶爾布因力弱不能抗拒勉爲服從等語是其心本無他情非得已朕已洞悉著傳諭扎那噶爾布此時但約束遊牧整頓兵力以待大兵前進共殲逆賊毋致驚惶擾亂事定後自當永受殊恩若扎那噶爾布果能奮力自拔卽束身歸命儻或不能惟宜安靜自守斷不得因已同阿巴噶斯等形迹交通妄生疑懼致貽後悔著詳悉曉諭知之○諭據阿蘭泰等奏拏獲阿睦爾撒納遣往遊牧之阿穆爾濟爾噶勒等七人解送烏里雅蘇台交永貴麒麟保嚴審等語所獲皆係重犯何不卽行審訊且永貴等又豈能究出端末著傳諭阿蘭泰等此際如已審訊一面取供具奏一面遣妥員解送熱河沿途嚴加防範如未審訊亦卽解來再阿逆之子斷

不可留卽解送至京阿逆之妻係訥默庫之姊伊二女朕降旨賞給訥默庫著哈達哈阿蘭泰卽交彼處○諭著傳諭哈達哈朕昨降旨令將和托輝特郡王青滾雜卜拏解來京今適有阿睦爾撒納之事伊罪止於附合阿睦爾撒納非決不可貸者也且和托輝特兵丁頗屬勇健萬一至於尙有用伊之處此際召伊如尙未到時卽不必宣拏問之旨可傳諭伊奉旨將汝召回原欲命汝進京加恩今適有阿睦爾撒納之事此處正有應辦事務暫且不必進京設有有用兵之處聽候調遣帶領和托輝特兵丁進發此時如阿睦爾撒納尙未就獲可同伊將如何擒拏阿睦爾撒納並如何進兵之處詳悉定議列名具奏如伊已到業經傳旨拏問仍著解送來京○庚辰諭軍機大臣等阿蘭泰等奏包沁總管阿克珠勒於八月二十九日回至遊牧殺傷官兵已遣總管鄂博什帶索倫

兵丁追緝包沁人眾並將烏里雅蘇台兵丁分駐各隘口等語所辦尙合機宜仍速行文鄂博什追及包沁人眾時諭以黨同阿睦爾撒納除阿克珠勒一人餘皆被其脅從不相株累前阿克珠勒入覲時朕卽疑其人狡猾難信擒獲時務訊明情節卽在本處正法將家口一併處斬仍於得木齊內揀選一人授爲宰桑管理游牧又從前納噶察會將阿睦爾撒納與阿巴噶斯等逆謀告知將軍班第今已束身來歸誠意可嘉伊兵力甚弱著傳諭令其速赴熱河或卽令整兵前進或於明年帶兵追捕阿睦爾撒納至時另行商辦至齊木庫爾先曾擒送阿睦爾撒納所遣之們都今又由烏蘭庫圖勒接出游牧並指陳應行防守堵截各事宜甚屬可嘉仍遵朕旨前來入覲再阿睦爾撒納有搶掠喀爾喀之信雖未足憑但伊游牧相離甚近平日頗悉喀爾喀情形或迫脅扎哈沁包

沁人等驚擾喀爾喀亦未可定哈達哈阿蘭泰等務宜加意豫備
計惟速將伊遊牧內移沿途密加防護方爲妥協阿蘭泰等見議
令青滾雜卜帶領新舊烏梁海堵截賊來要道卽傳諭青滾雜卜
帶伊所轄兵丁會同察達克赤倫等烏梁海兵丁協助額琳沁多
爾濟仍諭察達克受朕重恩又與阿睦爾撒納舊有仇隙益宜奮
勉務期擒獲逸賊並傳諭見在進兵人等與賊相遇各宜奮勇爭
先丕振軍威如能擒獲首惡其功更大必加格外殊恩以示鼓勵
○壬午 上奉 皇太后駐蹕避暑山莊○諭軍機大臣等額琳
沁多爾濟奏齊木庫爾於阿睦爾撒納未逃之先將伊欲叛情形
告知甚屬可嘉著傳諭哈達哈阿蘭泰不必將伊遊牧遷移仍令
安居原處候朕降旨○諭朕降旨命阿敏道領兵偵探班第信息
著傳諭永常派兵二百名遣幹弁續發再傳諭額琳沁爾與阿逆

有殺子之仇爾從哈薩克來思沐國家厚恩豈爲附合阿逆而來
今阿逆負恩悖叛爾當盡力效誠協助擒獲以承厚恩卽力有未
逮斷不可入於其黨阿逆孤身逃竄大兵進勦計日被擒伊尙不
能自保又豈能保他人乎此時如臺站已通卽照此繕寫發遞班
第如尙未通著速派兵續進○賞綽囉斯台吉噶勒藏多爾濟等
銀有差○癸未賜噶勒藏多爾濟等冠服○諭準噶爾部落人等
互相殘殺羣遭塗炭不獲安生朕統一寰區不忍坐視特發兩路
大兵進討各台吉管理鄂拓克宰桑等畏威懷德率屬來歸從軍
自效今已平定伊犁擒獲達瓦齊是用廣沛仁恩酬庸錫爵準噶
爾舊有四衛拉特今卽仍其部落樹之君長噶勒藏多爾濟封爲
綽囉斯汗車凌封爲杜爾伯特汗沙克都爾曼濟封爲和碩特汗
巴雅爾封爲輝特汗台吉和通額默根達瓦布魯爾封爲公台吉

巴泰曼集鄂勒椿達克巴授爲扎薩克一等台吉羅布藏巴顏察
罕吹扎布鄂諾什本塔什索諾木丹津諾爾布授爲扎薩克職銜
將伊等授爲扎薩克及所屬編次旗分佐領之處該部察例具奏
宰桑鄂勒哲依哈薩克錫喇俱授爲內大臣辦理圖什墨勒事務
鄂勒哲依仍管喀喇沁鄂拓克哈薩克錫喇仍管噶勒雜特鄂拓
克宰桑拉蘇隆達什車凌鄂哲特都噶爾鄂勒錐俱授爲散秩大
臣仍管各鄂拓克噶勒藏多爾濟等及管理鄂拓克之宰桑鄂勒
哲依等受朕深恩其董率所屬各勤教養共圖生聚爾等如恪遵
朕訓自永受無窮之福欽哉毋怠○諭軍機大臣等喀爾喀郡王
桑寨多爾濟此次軍營行走甚屬奮勉伊祖丹津多爾濟原係親
王著加恩晉封桑寨多爾濟爲親王以示優眷○准臺灣府彰化
縣水沙連淡防廳拳頭母山開墾升科○甲申諭軍機大臣等永

常奏傳喚扎哈沁宰桑鄂爾奇木濟託故不至情形可疑已密行
阿敏道喀爾納等命其酌量兵力擒拏等語鄂爾奇木濟係朕念
伊兄敦多克身故加恩授職之人若果懷二心自難寬貸今授普
爾普爲散秩大臣扎哈沁宰桑交副都統額勒登額侍衛端濟布
等帶往相機擒勦俟擒獲鄂爾奇木濟卽交端濟布解送來京又
將宰桑鄂勒哲依哈薩克錫喇吞圖布恩克博羅特等送回遊牧
整兵前進永常卽傳諭哈薩克錫喇之弟塔斌令其豫爲整備俟
伊兄一到卽協力前進勦捕又奏阿睦爾撒納見在逃叛恐搶掠
巴里坤見候阿敏道接續臺站信到卽從穆壘退回巴里坤防守
是竟置班第等於度外甚屬錯謬巴里坤卽須防守可留三格辦
理永常策楞整頓兵力作速前進遇阿巴噶斯哈丹之眾務行勦
滅三格若亦隨軍營前往卽著派豆斌就近調取綠旗兵二三千

名防守巴里坤至巴哈曼集將遊牧移於克什圖自係避賊豈有
從亂而反內移之理永常不辨虛實存心畏怯辦理種種未協此
旨接到卽同策楞奮勇前進毋得仍蹈舊轍愼之○諭阿蘭泰等
奏稱聞阿睦爾撒納見擬糾合叛黨接出遊牧並搶掠喀爾喀等
語此特虛張聲勢伊不但無此力量卽實有之當乘其未集擊之
甚易觀伊等奏報未免心存畏懼朕今命雅爾哈善前赴軍營會
同達爾竊阿哈達哈阿蘭泰共商議進兵著達爾黨阿雅爾哈善
前進哈達哈阿蘭泰續往兆惠舒赫德卽著在烏里雅蘇台軍營
辦事布拉罕察罕托輝地方甚近哈達哈等接得此旨卽派扎勒
杭阿帶見領兵丁一千名同溫布前往布拉罕察罕托輝等處追
捕阿睦爾撒納若馬力不足卽用阿睦爾撒納遊牧馬匹或暫派
齊木庫爾等遊牧之馬亦可再青滾雜卜察達克圖倫楚等前往

汗哈屯地方何以不卽遣伊等從彼處追捕阿睦爾撒納如遇阿
逆卽行擒獲否則仍同扎勒杭阿會商勦捕○乙酉諭軍機大臣
等昨遣普爾普赴軍營協勦鄂爾奇木濟今永常奏鄂爾奇木濟
並無異謀著傳諭額勒登額等將旨曉諭普爾普派侍衛端濟布
同伊回京額勒登額可仍赴西路○丙戌命副都統富德送台吉
噶勒藏多爾濟等前赴軍營在領隊大臣上行走○丁亥諭軍機
大臣等前因永常駐兵穆壘指示辦理尙屬奮勉故仍令辦將軍
事務授爲內大臣昨覽伊奏聞阿逆叛逃卽帶兵卻走實屬怯懦
不稱將軍之任著革去內大臣以副都統銜參贊效力定西將軍
著策楞補授策楞身負重譴朕加恩復用務宜奮興士氣揚播軍
威毋稍推諉此旨到時扎拉豐阿玉保亦將至軍營策楞速整齊
兵馬俟伊等到時會商擒勦阿巴噶斯哈丹等領兵直抵伊犁方

爲台宜觀準噶爾情形雖易變亂而我師以寡敵眾奮勇衝擊卽驚駭奔散可詢問帶往宰桑等將背叛之鄂拓克嚴行勦捕○以

徐垣爲安徽按察使

由江西吉安道遷

○戊子諭喀爾喀郡王巴雅爾什

第等追勦包沁叛賊生擒阿克珠勒斬馘合拉克等奮勉可嘉巴雅爾什第著加恩封爲親王貝子沙克都爾扎布封爲貝勒公達爾扎諾爾布扎布封爲貝子協理台吉達瑪琳封爲公其餘奮勉行走官員兵丁著哈達哈等查明報部議敘陣亡者亦查明照例恩卹阿克珠勒卽派員嚴行管押來京治罪○免江蘇武進等二縣元年至十五年開抵役租銀兩○庚寅諭阿睦爾撒納上年率眾來歸朕加恩撫納封以王爵伊於召見時面陳略定準夷之策朕以其才可用爰授定邊左副將軍爲我師嚮導近官軍奏凱朕召諸部台吉齊集熱河將行飲至之典詎阿睦爾撒納在伊犁軍

營時輒以私印調兵並遣使與哈薩克私通揚言非令伊總統準
部不可種種不法節經班第等奏聞伊心懷叵測揣知軍前大臣
必行參奏不得已赴召前來行至中途遂將印信交親王額琳沁
多爾濟託故逃遁潛遣其黨七人來取家屬伊兄齊木庫爾執使
首告伊妻亦以其負恩逃叛憤激不從願移內地阿睦爾撒納已
爲無家之人而竄匿之初乘厄魯特諸部台吉見俱入覲輒布流
言希圖煽惑眾聽搶掠臺站乃西路各部台吉俱堅心內向有業
克明安宰桑扎木參等率所部數千人赴永常處叩請遷移附近
軍營居住以爲倚庇乃永常不審虛實疑爲詭計張皇失措挾其
宰桑置軍中爲質兼程卻走復恐或躡其後撤行策楞以兵接應
並將前遣安接臺站之副都統阿敏道行文撤回退駐巴里坤拒
守夫阿睦爾撒納負恩逃叛眾部同仇卽伊兄弟妻子亦皆憤恨

離心况附和同叛之包沁部落北路聞信往勦酋首卽已就擒部
衆殲滅是阿睦爾撒納子身遁逃無難計日擒戮若當諸台吉叩
轅請告之時永常克振軍威諸部得所依倚厲兵迅往追捕叛逆
其勢甚易何至爲浮言驚駭無端退避使新附寒心士卒沮氣貽
誤一至於此且伊前赴軍營時籌辦諸務率多冒昧卽如軍行已
有定站而錯會文移遽令剋日兼程前進兵糧業經支給猶喋喋
以口食不繼爲詞希冀邀譽市恩竟不顧衆心搖惑此類難以枚
舉朕是以但飭其駐烏嚕木齊聯絡聲援不使偕衆統兵進發蓋
早知其中無定見全不察事理之輕重也茲當伊犁久經平定回
部率屬歸誠所辦者僅一潛蹤伏莽之逸賊耳而永常始則未知
確實疑係窮夷自相劫掠奏請帶兵追逐意尙近於奮勉迨一聞
阿睦爾撒納在逃之信忽爾畏葸乖張甘心僨事實出情理之外

若不重治其罪何以任將帥而勵戎行永常著革職拏解來京治罪定西將軍印務前有旨著策楞補授今觀策楞竟不能自發一謀自出一慮惟聽永常妄行調遣恐不能勝將軍之任策楞著仍在參贊大臣上行走卽日帶兵前往其定西將軍著扎拉豐阿補授○諭軍機大臣等吳達善奏劉統勳隹永常來札檄調甘肅綠營官兵援剿所辦甚屬錯謬阿睦爾撒納係聞軍營大臣參奏畏罪潛逃豈能遽犯巴里坤致爲邊患試思從前噶爾丹策零時尙不能輕犯邊境况阿睦爾撒納素爲眾惡又復負恩逃竄人人恨其反覆卽伊兄弟妻子亦盡離心以一窮蹙亡命何能飛度巴里坤哈密而須盡徵內地綠旗兵於數千里外爲拒守計耶且見據北路官兵將附和逆賊之包沁首惡就縛黨羽殲除軍威已振西路兵力不爲不敷與其調兵何若勤辦馬駝口糧應見兵之用劉

統勳尙爲稍知事體者何一接永常來信竟不詳加審度惶遽若此定西將軍已著扎拉豐阿補授著速傳諭劉統勳令其就軍營見有官兵料理馬駝口糧卽日前進如同肅辦理尙需時日並傳諭吳達善令其就近速爲籌備或調營馬或另行購買其價值不拘成例一面報知該協督卽於甘肅一帶分槽餵養聽候調遣若購得臚壯之馬卽先行解送軍營又諭劉統勳奏請駐哈密籌辦進兵事宜甚屬錯謬朕初不意劉統勳亦張皇失措茫無定識至於如此業克明安宰桑扎木參等久經內屬來求依託必無被賊煽誘轉相窺伺之事此特永常望風疑畏自行驚擾所稱目覩情形者豈果實有確據耶阿睦爾撒納在此時不過一亡命逸賊耳况素爲諸部所惡人皆切齒其北路同叛之包沁等已被擒戮焉能一時鼓動諸部飛越數千里至巴里坤此事理所必無者軍營

眾心所持全在領兵大臣今一將軍一總督一都統無端自相驚怖舍穆墨而回巴里坤今又議舍巴里坤而就哈密軍心其何所持劉統勦著嚴行申飭仍令速遵前旨卽籌辦馬匹口糧儘見在兵數或三千或二千剋期進發見已一誤再誤豈容更爲猶豫在劉統勦軍務原非所諳但識見乖謬至此實在朕意料之外此時臺站偶斷止應急籌安接以通伊犁聲惠所發班第等報匣何至盡行繳回竟漠然置之度外是何心耶著一併嚴行申飭報匣仍發回○諭據永常奏請派兵七八千名進勦今僅有五千八百餘名先辦理馬駝口糧以利進行等語所奏益爲迷謬阿睦爾撒納之力斷不能據有伊犁所依附爲惡者不過阿巴噶斯哈丹數人耳今入覲諸台吉宰桑等俱云四衛拉特多係阿睦爾撒納仇讐前來入覲時卽已各飭遊牧豫爲防範永常聞阿睦爾撒納潛逃

卽心神擾亂一似賊眾已全收準部非大兵不能恢復者是以將
伊拏問著傳諭策楞速整見有之兵相機前進俟扎拉豐阿玉保
到時與噶勒藏多爾濟等台吉宰桑會商勦賊通信伊犁至臺站
斷絕後發還班第等奏匣永常理應收貯俟接續後仍行發往乃
遠爾繳回是置班第等於度外永常忍心若此實出情理之外若
永常策楞在伊犁他人或棄置如此伊能甘心乎永常業經拏問
著策楞卽派委幹員嚴加看守如或畏罪自戕惟策楞是問○乙
未賜業克明安台吉巴桑和碩特台吉色布騰等冠服銀兩有差
○丙申諭劉統勳奏西路實在情形一摺乖謬已極見今伊犁平
定之後阿睦爾撒納背恩叛竄阿巴噶斯哈丹弟兄不過一鄂拓
克之宰桑爲所煽誘搶掠臺站業克明安宰桑扎木參等率眾求
請於附近軍營居住而永常妄生疑懼遂退回巴里坤今噶勒藏

多爾濟之子諾爾布琳沁卽帶兵千餘殺退阿巴噶斯兵眾則西路全勢並無絲毫變動若使永常仍駐穆墨率來歸之眾令爲前驅奮往直前早通伊犁聲息而追尋阿睦爾撒納逋逃蹤迹西陲當已安帖無事矣乃永常惟怯於前劉統勳附和於後實出情理之外軍營所恃全在領兵大臣今一將軍一總督無端自相恐怖眾心其何所恃耶劉統勳奏內所云諾爾布琳沁等來告之說俱未可深信夫諾爾布琳沁爲守護遊牧始則懇求內移繼則率眾勦賊見將阿巴噶斯之得木齊班咱擒送來營情形若此尙何不可信之有又云內外之界不可不分試思各部自歸誠以來悉已隸我版圖伊犁皆我界內尙何內外之可分今西路諸台吉宰桑皆知遣人來告軍營求以兵力壯其聲勢其自效之意顯然可見而永常劉統勳乃望風疑畏甚欲全調陝甘滿漢標營馬匹且以

三
向年巴里坤孤懸塞外馬駝被劫爲詞夫雍正年間準噶爾以其
全力鴟張鼠竊視今日之一舉蕩平諸部歸誠相去天壤三尺童
子莫不知之劉統勳作此種種乖謬之語貽誤軍事且班第等在
伊犁係辦理軍務大臣劉統勳並不與永常急謀安接臺站竟奏
請退回哈密而置班第等於不問伊身爲總督見在巴里坤一切
軍營應辦事宜何莫非其專責卽如軍營馬匹見俱乏弱縱撤回
之馬不無疲瘦而所有一切馬匹何以不豫飭參養臙壯劉統勳
所司何事糜費錢糧不能適用其罪尤無可逭昨據冶大雄奏到
伊將安西官兵忽而調遣忽而停止馬力豈不更加疲乏永常已
降旨革職拏解來京劉統勳如此乖張貽誤軍旅重務若以其係
漢人爲之寬恕而不治以應得之罪則是朕歧視滿漢且將復何
以用人何以集事耶劉統勳著革職拏解來京治罪伊子劉墉亦

著革職拏交刑部永常子額勒登額著革職在軍營效力永常劉
統勳在京諸子並著拏交刑部所有各本旗籍及任所貲財並著
查出爲償補軍需馬匹之用○諭陝甘總督大學士黃廷桂尚未
來京見在軍營有應辦糧馬事務著方觀承馳驛前往辦理其直
隸總督印務著鄂彌達署理○諭軍機大臣等據永常奏稱諾爾
布琳沁聚集兵丁擊敗阿巴噶斯之眾擒其得木齊班咱解送前
來扎那噶爾布復來歸附又布庫努特之得木齊諾爾布亦率屬
來歸等語諾爾布琳沁等如此效力而永常尙不出兵接應且以
馬力疲乏爲詞實屬怯懦之至著傳諭策楞諾爾布琳沁尙在幼
年卽能如此奮勇著加恩封爲郡王策楞卽於見在兵丁內選派
千餘名疾速帶領前進策應諾爾布琳沁仍傳旨獎諭諾爾布琳
沁並告以伊父噶勒藏多爾濟朝夕卽至令其整頓兵力會合邁

行協助將軍班第等勦除逆亂所擒之得木齊班咱卽由臺站解
送至京仍慰諭扎那噶爾布令其堅心內附以受朕恩並偵探班
第等信息速爲奏聞○諭見在審訊扎木參係與阿睦爾撒納同
黨已將伊治罪著傳諭哈達哈等查伊妻子及所屬宰桑等嚴行
拘管其從前賞賚物件俱追入官所有戶口牲畜什物著查出賞
給齊木庫爾再前曾降旨令將班珠爾等之戶口牲畜賞給此次
效力之喀爾喀王公大臣等今訊其宰桑禪宗並未同謀已加恩
將禪宗父子釋放所有戶口牲畜並著停其實給仍交與辦理伊
等遊牧之大臣等暫行安插禪宗並著賞銀一百兩○丁酉諭喀
爾喀喇嘛諾顏綽爾濟在阿睦爾撒納遊牧誦經聞阿睦爾撒納
之喇嘛楚魯木班珠爾以理阻止阿逆部眾不使逃竄諾顏綽爾
濟卽給與楚魯木班珠爾衣服以示獎勵並令其安撫眾人深知

大義殊屬可嘉著加恩賞給清蘇朱克圖諾們汗之號其印信卽入於辦理扎薩克印信內鑄給○封厄魯特貝勒齊木庫爾爲郡王○調汪由敦爲刑部尙書由工部調○戊戌諭軍機大臣等朕前諭將阿睦爾撒納班珠爾納噶察等屬人移於通肯呼裕爾今思沿途解送需派兵丁見在喀爾喀部落較從前頗知奮勉效力著將阿睦爾撒納等遊牧停其遷移除賞給齊木庫爾等人眾外所有戶口俱分賞喀爾喀等爲僕卽著兆惠車布登扎布查明人數均勻賞給仍令嚴加約束稍有滋事卽行治罪毋得令其脫逃○己亥諭太子少保內大臣戶部尙書海望老成敬慎辦事實心宣力有年勤勞懋著昨患痰證亟賜醫藥尙冀痊可遽然溘逝朕心深爲悼惜著賞銀二千兩治喪遣散秩大臣博勒奔察帶領侍衛往奠茶酒所有應得卹典該部察例具奏尋予祭葬諡勤恪○命截

留湖廣漕糧二十萬石江西漕糧十萬石於江南備賑○庚子諭軍機大臣等詢問納噶察將阿睦爾撒納一切悖逆妄行之處據實供吐朕已施恩免罪仍留公爵著傳諭哈達哈等將納噶察及伊弟巴勒濟達克巴戶口俱停其辦理昨降旨將納噶察屬人賞給德濟特普爾普等今既給還著於班珠爾屬人內量爲分賞亦傳諭兆惠車布登扎布等知之○諭訊據班珠爾供伊欲寫信付和碩特台吉三濟特鄂齊爾等令其曉示和碩特遊牧人等將阿睦爾撒納擒獻等語三濟特鄂齊爾業已起程班珠爾之信交伊宰桑禪宗齋往著傳諭富德侯禪宗到時將班珠爾之信交三濟特鄂齊爾轉送和碩特人等並將三濟特等言語情形奏聞禪宗已加恩授爲散秩大臣著帶往軍前聽候調遣○召彭家屏來京以許松佶爲江蘇布政使託恩多爲江蘇按察使

冬十月辛丑朔諭軍機大臣等據策楞奏稱官兵器械須豫備整齊隨同將軍進發等語策楞身獲重譴朕加恩賞給都統職銜令往西路理宜奮勉效力今伊觀望遲延毫無振作怯懦已極著扎拉豐阿一至軍營卽傳旨將策楞拏解來京仍派員看守不得令其自盡三格雖非參贊亦係領隊大臣一意推諉亦有應得之罪著革去副都統留軍營效力贖罪○命副都統莽阿納哈甯阿爲西路領隊大臣○壬寅諭軍機大臣等哈達哈阿蘭泰等奏郡王青滾雜卜請派兵五萬名於明年進剿等語從前因青滾雜卜諸事迎合阿睦爾撒納曾經降旨拏問第因其情尙可恕且當用人之際是以復諭停止以觀後效今詢問阿睦爾撒納屬人供稱青滾雜卜將班第薩喇爾參奏之處通信阿睦爾撒納伊旣從中漏洩則聞其叛去心必惶懼見在所請派兵進剿之說亦非誠心效

力不過藉此姑延時日若留伊辦事非惟不得其力轉須留心防範於事無益著哈達哈等仍遵前旨將青滾雜卜拏解來京其貝勒令伊子承襲所領和托輝特兵丁哈達哈等卽酌派大員管轄○諭哈達哈等奏稱九月十一日選派索倫喀爾喀兵丁令虛銜藍翎蒙固勒岱帶領白庫布克爾起程採取班第等信息等語哈達哈等較西路尙知奮勉所奏從四十八臺脫出之喀爾喀達瓦厄魯特巴顏等告稱隨從阿睦爾撒納人眾念其妻子羣相怨恨看此情形惟速帶兵進剿卽可擒獲達瓦巴顏等被掠脫出著酌量賞賚至根敦扎布負恩背叛情罪可惡將伊妻子近屬拏解來京其僕人分賞索倫喀爾喀等前命喀喇巴圖魯阿玉錫在哨探兵隊行走今哈達哈奏稱遣往齊木庫爾遊牧此際應已接奉諭旨卽遵照前旨速赴軍營○甲辰以阿里衮爲戶部尙書納穆扎

爾爲戶部右侍郎舒明爲吏部左侍郎德爾敏爲左副都御史

由工部左侍郎遷

○以衛哲治爲工部尚書鄂寶署廣西巡撫

由奉天府尹署

○丙

午諭軍機大臣等哈達哈等奏令郡王青滾雜卜同扎勒杭阿等帶兵追捕阿睦爾撒納等語朕因和托輝特兵尙可用曾將青滾雜卜暫停拏問近聞其暗結阿睦爾撒納而所請明年派兵進剿之語顯係遲回觀望是以仍令拏解來京但哈達哈等業已派令帶兵前進又復調回必生疑懼著傳諭哈達哈若接到拏問諭旨尙未舉行卽速赴伊營留心察看儻誠心奮勉仍免其拏問將前旨及奏摺密封進呈若情形叵測哈達哈先酌定堪以管轄和托輝特兵眾之人卽將青滾雜卜拏解來京此際最宜斟酌妥協詳慎辦理從前班第等參奏阿睦爾撒納伊尙聞知暗中通信今伊自知罪愆必多顧慮尤宜加意慎密○諭哈達哈等奏令郡王青

滾雜卜等帶兵前進伊等亦陸續進發又據從臺站脫出人告稱
於鏗格爾西喇托輝等處曾遇阿睦爾撒納等語看來阿睦爾撒
納情形甚爲窘迫若督兵速進自當擒獲朕已將分隊帶兵之處
降旨伊等自當遵照辦理阿睦爾撒納搶掠臺站時塔本集賽人
等亦至額爾齊斯等處搶掠今大兵前往務將從賊黨羽悉心搜
捕如塔本集賽等遊牧更宜勦絕以壯軍威若能直至伊犁地方
通信班第等併力夾攻固爲甚善或須俟西路兵力卽據形勢之
地以待聲援相機進剿哈達哈等固不可稍存畏蕙亦當計出萬
全妥協辦理至從臺站脫出之喀爾喀及訥默庫巴圖博羅特等
屬人勞悴可憫哈達哈等卽酌量賞賚以示鼓勵○諭前因杜爾
伯特部落人眾已分爲兩翼各授盟長看來盟長二員尙屬不敷
著將軍凌車凌烏巴什訥默庫俱授爲盟長並著色布騰爲車凌

之副車凌孟克爲車凌烏巴什之副噶勒藏多爾濟爲訥默庫之副輝特部落人旣無多卽著齊木庫爾爲盟長和碩特部落著沙克都爾曼濟爲盟長俱不必副○命浙江再截留漕糧五萬石備賑○丁未封親王訥默庫子喇嘛扎布爲貝勒○戊申 上奉

皇太后自避暑山莊回鑾○諭富勒赫奏趙永德呈首原任郎中

程鑿作詩誹謗悖逆見交布按二司嚴審一摺朕閱程鑿鈔刻詩冊膚淺本不成詩但其中並無譏訕悖逆之語而送王大一首係鈔襲古詩以爲己作則富商無識務名之習畢露看來此事明係趙永德索詐不遂挾嫌誣害富勒赫爲其所愚據以入奏耳從前胡中藻身爲翰林心懷怨望竟作種種悖妄之詞刊刻分送若不重加懲治無以正人心而端風紀是以不得不行辦理儻因有此案動於語言文字之間指摘苛求則狡黠之徒藉以行其誣詐有

司不察輒以上聞告訐紛繁何所不至迨至辨明昭雪而貽累已甚此等刁風斷不可長趙承德著交該撫莊有恭嚴審定擬具奏尋奏趙承德審係訛詐提訊朋謀人等定擬得旨知道了此必待朕諭而後敢如是辦理可謂不知朕意亦不識大臣之體矣可愧○己酉諭軍機大臣等據策楞奏稱杜爾伯特台吉班珠爾來稟班第薩喇爾等帶領達什達瓦兵丁由珠勒都斯覓路而出等語班第薩喇爾鄂容安瑪木特僅率兵數百驟值賊匪爲變朕心實爲廬慮是以屢降諭旨催趙永常策楞赴援今聞班第等已出深堪軫恤將朕所佩荷包發去班第薩喇爾鄂容安瑪木特各賞給一箇目今擒捕賊匪最爲緊要計班第薩喇爾到時扎拉豐阿玉保噶勒藏多爾濟諒皆可到伊等公同商議將所有兵眾歸併一處或由額林哈畢爾噶地方搜捕或徑行平定伊犁之處詢問鄂

勒哲依相機辦理布庫努特庫圖齊納爾阿巴噶斯等鄂拓克人戶俱著殲戮其宰桑頭目悉從誅夷馬匹牲畜分賞兵眾以壯軍力杜爾伯特台吉班珠爾聞知卽爲送信沙津巴圖自伊犁通信均屬可嘉班珠爾著加恩封爲公爵沙津巴圖授爲三等侍衛達什達瓦屬下人等交班第等按其勞績分別奏請加恩班第如尙未到策楞可卽傳諭班珠爾沙津巴圖令其忻喜一面鈔錄諭旨迎路發與班第○辛亥諭軍機大臣等哈達哈等奏據厄魯特巴雅爾供青滾雜卜帶往烏梁海之諾爾布丹津係巴特瑪車凌之弟於七月內曾往見阿睦爾撒納其巴特瑪車凌所屬六十戶見在青滾雜卜軍營等語看來青滾雜卜必有通信於阿睦爾撒納之事是以令諾爾布丹津前往且查出巴特瑪車凌戶口亦未呈報前曾兩次降旨拏伊來京繼又中止儻伊知覺懷疑生懼愈滋

事端著傳諭達爾黨阿將青滾維卜喚回拏解或令哈達哈卽於軍前拏解其選派大員管理和托輝持兵眾及令伊子承襲貝勒之處俱遵前旨行○命江南災地折賑米價每石加銀二錢○壬子諭劉統勳因永常自穆壘退回巴里坤輕信浮言張皇附和奏請退守哈密拒絕歸附之諾爾布琳沁種種乖謬不可枚舉是以降旨革職拏解來京治罪夫律以逗撓軍機搖惑輿情卽置之法實無可追但朕念劉統勳所司者在糧餉馬駝其軍行進止原係將軍之事設令模稜之人緘默自全轉可不致獲罪是其言雖刺謬其心尙可原也况永常尙不知死綏之義何怪於懦弱書生劉統勳在漢大臣中平日尙奮往任事朕於萬無可寬之中求其一綫可生予以自新之路劉統勳著從寬免其治罪發往軍營交班第等令其在司員內辦理軍需效力贖罪儻伊以爲士可殺而不

可辱欲來京甘受典刑亦惟其所自處伊子俱著釋放劉墉著加恩令其編修上行走自效至策楞去歲卽以懼怯獲罪今復用爲都統於永常退同時卽當一面參奏一面帶兵進剿乃一味曲從依違觀望故亦降旨革職拏問在伊實有應得之罪但此番坐失機宜永常實爲罪首策楞乃係因伊獲譴亦著從寬免其治罪交與扎拉豐阿令在司員內辦理糧餉效力贖罪劉統勳前後所奏諸摺並發○癸丑諭軍機大臣等喀爾喀扎薩克琳丕勒多爾濟等於阿睦爾撒納逃竄時被其掩襲力戰得脫仍將賊人後隊軍裝收獲奮勉可嘉著加恩將琳丕勒多爾濟封爲公賞銀一百兩其驍騎校齊克慎授爲三等侍衛賞銀四十兩虛銜藍翎永德伍岱俱授爲藍翎侍衛各賞銀三十兩並馳驛前往軍營效力行走訥默庫屬人諾斯海剛多爾濟屬人鄂勒哲依亦各賞銀二十兩

同琳丕勒多爾濟遣同各遊牧○甲寅 上奉 皇太后還京師

○定盛京大政殿朝期覈對職名例○丙辰諭軍機大臣等哈達哈等奏據脫出之巴拜等供稱阿睦爾撒納遣宰桑尼瑪前往烏梁海宰桑果勒卓輝處通信會合等語汗哈屯烏梁海等係兵力收服非察達克車根赤倫等與賊有仇久經歸順者可比我兵既進伊等或襲其後甚有關繫達爾黨阿哈達哈等宜加意防範再察達克等去歲投誠俱加恩授職此次收服宰桑果勒卓輝瑪濟岱等著加恩授爲三品總管賞給翎頂其餘宰桑有應酌量授爲三四品總管未經查奏者著達爾黨阿等查明酌量授職一面奏聞一面辦理再伊等馬匹牲隻若以銀兩段疋與之交易既可分伊等之力亦藉以助給軍需即可傳諭察達克等若能勉力承辦必加恩賞○諭富德奏稱額爾齊斯之北有達布遜圖喇地方係

準噶爾哈薩克俄羅斯交界其地產鹽興圖所載額爾齊斯之北有鹽池卽其地也距塔爾巴哈台千里阿睦爾撒納勢力窮蹙或由此路逃往俄羅斯亦未可定著傳諭達爾黨阿哈達哈等帶兵進發後或令哈薩克赤倫等帶伊舊烏梁海兵數百名赴其地巡查堵截或於索倫兵內分數百人前往亦可伊等願往所派兵丁俱照軍營一體賞賚○丁巳以達瓦齊羅布扎莽喀圖巴敦多克和通等解送至京遣官告祭太廟社稷行獻俘禮○建四川打箭爐城垣○戊午上御午門樓受俘釋達瓦齊等交理藩院○御製平定準噶爾告成太學碑文曰遼矣山戎薰粥旃裘羣幕之人界以龍沙畜其驕奚雖無恆業厥有分部蓋自元黃剖判萬物芸生東夷西夷各依其地謬舉滔維未爲理據皇古莫紀其見之書史者自周宣太原之伐秦政互海之築莫不畏其侵軼猾

夏是虞自時厥後一二奮發之君慨然思挫其鋒而納之宥然事
不中機材不副用加以地遠無定處故嘗勞眾費財十損一得損
紳之儒守和親介冑之士言征伐征伐則民力竭和親則國威喪
於是有守在四夷羈縻不絕地不可耕民不可臣之言興矣然此
以論漢唐宋明之中夏而非謂我皇清之中夏也皇清荷天之
龍興東海撫華區有元之裔久屬版章歲朝貢從征狩執役惟謹
準噶爾厄魯特者本有元之臣僕叛出據海西終明世爲邊患至
噶爾丹而稍強吞噬鄰蕃闌入北塞我皇祖三臨朔漠用大破
其師元惡伏冥誅暫從遠遜迹毋俾遺種於我喀爾喀厥姪策旺
阿喇布坦收其遺孽僅保伊犁故當索俘取地無敢不共逮夫部
落滋聚乃以計襲哈密入西藏準夷之勢於是而復張兩朝命
將問罪雖屢獲捷而庚戌之役逆子噶爾丹策零能用其父舊人

乘我師怠掠畜於巴里坤擣營於科布多於是而準夷之勢大張
然地旣險遠主客異焉此勞往而無利彼亦如之故額爾德尼招
之敗彼亦以彼貪利而深入也 皇考謂我武惟揚不可以旣允
其請和以息我眾予小子敬奉 先志無越思焉旣而噶爾丹策
零死子策妄多爾濟那木扎勒暴殘喇嘛達爾扎篡奪之達瓦齊
又篡奪喇嘛達爾扎而酗酒虐下尤甚焉癸酉冬杜爾伯特台吉
車凌等率數萬人來歸越明年秋輝特台吉阿睦爾撒納和碩特
台吉班珠爾又率數萬人來歸朕謂來者不可以不撫而撫之莫
若因其地其俗而善循之且毋令滋方來之患於我喀爾喀也於
是議進兩路之師問彼罪魁安我新附凡運餉籌馱長行利戰之
事悉備議之始熟經於庚戌之艱者咸懼蹈轍惟大學士忠勇公
傅恆見與朕同而新附諸台吉則求之甚力朕謂犁庭掃穴卽不

敢必然喀爾喀之地必不可以久居若而人毋甯用其鋒而觀厥成卽不如志亦非所悔也故凡禡旗命將之典槩未舉行亦云偏師嘗試爲之耳塞上用兵必以秋而阿睦爾撒納瑪木特請以春月欲乘彼馬未肥則不能遁朕謂其言良當遂從之北路以二月丙辰西路以二月己巳各啓行哈密瀚海向無雨今春乃大雨咸以爲時雨之師入賊境凡所遇之鄂拓克攜羊酒糗糒迎恐後五月乙亥至伊犁亦如之達瓦齊於格登山麓結營以待兵近萬我兩將軍議以兵取則傷彼必眾念彼眾皆我眾多傷非所以體上慈也丁亥遣阿玉錫等二十五人夜斫營覘賊向賊兵大潰相蹂躪死者不可勝數來降者七千餘我二十五人無一人受傷者達瓦齊以百餘騎竄六月庚戌回人阿奇木霍集斯伯克執達瓦齊來獻軍門準噶爾平是役也定議不過二人籌事不過一年兵行

不過五月無亡矢遺鏃之費大勦以集遐壤以定豈人力哉天也然天垂佑而授之事機設不奉行之以致坐失者多矣可與樂成不可與謀始亦謂蚩蚩之眾云爾豈其卿大夫之謂旣克集事則又曰苟知其易將勸爲之夫明於事後者必將昧於幾先朕用是寒心且準噶爾一小部落耳一二有能爲之長而其樹也固焉一二暴失德之長而其亡也忽焉朕用是知懼武成勒碑 文廟例也禮臣以爲請故據實事書之其辭曰茫茫伊犁大幹之西匪今伊昔化外羈縻條支之東大宛以南隨畜獵獸蟻聚狼貪乃世其惡乃恃其遠或激我攻而乘我緩其計在斯其長可窮止戈靖邊化日薰風不侵不距不來其那款關求市亦不禁訶始慕希珍終居奇貨吏喜無事遷就斯悞漸不可長我豈懼其豈如宋明和市之爲旣知其然飭我邊吏弗縱弗嚴示之節制不仁之守再世斯

斬篡奪相仍飄忽在萑風沙革面煎鞏披忱集泮飛鵲食騃懷音
錫之爵位榮以華裾膝前面請願效前驅分兵兩路雪甲霜鋒先
導中堅如壘錯攻益以後勁蒙古舊屬八旗子弟其心允篤二月
卜吉牙旗飄飄我騎斯騰無待折膠泉湧於磧蕪茁於路我眾歡
躍謂有天助匪啻我眾新附亦云黃髮未覩水草富春烏嚕木齊
博囉塔拉台吉宰桑紛紛款納牽其肥羊及馬運酒獻其屠耆合
掌雙手予有前諭所禁侵陵以茶交易大愉眾情眾情旣愉來者
日繼蠶達瓦齊擁兵自衛依山據淖惟旦夕延有近萬人其心十
千勇不目逃掄二十五日阿玉錫率往賊所銜枚夜襲直入其郭
揮矛拍馬大聲疾呼彼人旣離我志斯合突將無前縱橫鞚鞞案
角鹿埤隴種籠東自相狼藉孰敢攖鋒狐竄鼠逃將往異域回部
遮之兇渠斯得露布旣至告廟受俘凡此歲功荷天之衢在古

周宣二年乙亥淮夷是平常武詩載越我 皇祖征噶爾丹命將
禡旗亦乙亥年旣符歲德允協師貞兵不血刃漠無王庭昔時準
夷弗恭弗諱今隨師行爲師候尉昔時準夷日戰夜征今也偃卧
知樂人生曰匪準夷曰我臣僕自今伊始安爾遊牧爾牧爾耕爾
長孫子曰無向非豈有今是 兩朝志竟億載基成側席不遑保
泰持盈勒石 大成殿阼階前 御製平定準噶爾勒銘伊犁碑
文曰惟 天盡所覆畀我皇清罔不在宥惟清奉 昊天撫薄海
兆庶悉主悉臣 太祖 太宗 世祖肇基宅中皇耆其武 聖
祖 世宗觀光揚烈克臻邺隆逮予藐躬思日孜孜其四海同風
咨汝準噶爾亦蒙古同類何自外搆數世梗化篡奪相仍顧仇其
下惟達瓦齊甚毒於醒眾心底底如苗斯蠹如虺斯螫眾口嗷嗷
視爾嗷止予焦勞止期救不崇朝止視爾底止予噫嘻止亟出汝

塗泥止乃命新附爾爲先鋒熟悉其路迺命勁旅攜數月糧毋或
掠擄師行時雨王旅嘽嘽亦無滯阻左旋右抽王旅渾渾旣暇以
休烏嚕木齊及五集賽度之折折台吉宰桑迎降恐後奚事斧吭
博囉塔拉闡勒奇嶺險如關闔倒戈反攻達瓦齊走旦夕塗窮回
部遮獲彼鼠斯喙地入無隙露布飛至受俘千門爰貸其罪自今
伊始四部我臣伊犁我宇曰綽囉斯及杜爾伯特和碩特輝特封
四可汗眾建王公遊牧各安宰桑公臣屬我旗籍誰汝苦辛爾恭
爾長爾慈爾幼徐以教養爾駝爾牛爾羊爾馬畜牧優遊分疆各
守毋相侵陵以干大咎齊禦外域曰布魯特越哈薩克醉飲飽食
敬興黃教福自天錫伊犁平矣勒貞珉矣於萬斯年矣勒石伊犁
東岡 御製平定準噶爾勒銘格登山碑文曰格登之崔嵬賊固
其壘我師堂堂其固自摧格登之巖巖賊營其穴我師恍恍其營

若綴師行如流度伊犁川粵有前導爲我具船渡河八日遂抵格
登面淖背巘藉彼昏冥曰擣厥虛曰殲厥旅豈不易將韜我武
將韜我武詎曰養寇曰有後謀大功近就彼眾我臣已有成辭火
炎崑岡懼乖皇慈三巴圖魯二十二卒夜斫賊營萬眾股栗人各
一心孰爲汝守汝頑不靈尙竄以走汝竄以走誰其納之縛獻軍
門追悔其遲於恆有言曰殺甯育受俘赦之光我擴度漢置都護
唐拜將軍費貽勞眾弗服弗臣旣臣斯恩旣服斯義勒銘格登永
詔億世勒石格登山○諭軍機大臣等哈達哈等奏見在帶兵前
進約於一月內可到察罕呼濟爾等語阿睦爾撒納雖子身逃竄
傳聞在博囉塔拉地方會合彼處賊眾約有三四千人若哈達哈
等兵少輕進亦有可虞伊等固不可恇怯退縮亦不宜冒昧嘗試
著傳諭達爾黨阿哈達哈等遵旨先遣精壯兵丁前行哨探相機

進止與西路會合共得兵四五千名卽奮勇追勦務期弋獲又所
奏遣往哈薩克之索倫跟役布顏圖傳哈薩克有出兵之信從前
伊部落遣使前至軍營甚屬恭順茲復何由起釁或被阿睦爾撒
納煽惑或布顏圖棄伊主逃回妄爲捏飾俟送到時嚴行審訊旣
有此語達爾黨阿等應行知遣往哈薩克之侍衛德善令伊等暫
時留待俟審訊明確再行遣往○辛酉諭軍機大臣等策楞奏稱
據達什達瓦屬人索諾木從伊犁脫出告知將軍班第等陷賊之
信見在達什達瓦之妻率其遊牧前來等語此信屬實必須會合
兵力大爲辦理昨降旨令達爾黨阿等同噶勒藏多爾濟帶兵前
往西路會同進勦伊等諒已前進今聞阿巴噶斯哈丹等兵敗後
潛匿山中策楞卽帶兵與諾爾布琳沁相見若其力可用卽會兵
速進如少覺單弱則據守要害之地俟達爾黨阿等到日整飭兵

力嚴行勦捕已諭總督方觀承等催趙馬駝解赴軍營應用將來
自必陸續得信策楞惟相機乘勢勿少退讓亦勿致冒昧前進方
爲妥協但此係索諾木一人之言達什達瓦之妻及軍營侍衛滿
楚等尙未抵營或係逆賊造言惑聽亦未可定策楞尤宜加意偵
探達什達瓦家口若至軍營卽令在巴里坤居住令和起照管其
派出達什達瓦兵丁隨營進勦存留甯夏莊浪兵丁駐防各事宜
俱照所奏行派出兵丁照見在進兵例賞給整裝銀兩外仍每名
賞銀三兩並派散秩大臣阿雅勒虎揀選可用宰桑數員在軍營
效力行走至索諾木所稱八月內敦多克曼集巴朗圖布慎會同
喇嘛回人等作亂班第鄂容安被陷而薩喇爾帶兵百人爲烏魯
特宰桑納親哈什哈之子錫克錫爾格所困又伊犁之喇嘛等傳
書達什達瓦遊牧阻其遷移各情節俱屬可惡策楞等進勦時務

將此項賊人臨陣斬獲或擒拏解京治罪勿使漏網看來助惡者亦不過數人未必全行煽亂著派侍衛滿楚及陸續投來人內令其前赴伊犁曉諭眾厄魯特寬其脅從勸以反正有能擒賊自效者必格外加恩備阿睦爾撒納已在伊犁卽不必宣示惟整兵進剿速行拏捕以昭國法見在既有此信則從前發回班第等奏匣及節次諭旨不必久候著扎拉豐阿策楞卽行閱看相其緩急次第辦理策楞此次辦事頗知奮勉著加恩授爲參贊大臣給與副都統職銜扎拉豐阿未到時仍著署理將軍事務並著傳諭扎拉豐阿知之○王戌策楞奏諾爾布琳沁遣宰桑諾爾布齊木布來告擊敗阿巴噶斯哈丹後欲卽進剿因塔本集寶與之合且業克明安台吉察袞德濟特俱同黨據險恐其夾攻暫移都爾博勒津遊牧阿巴噶斯等見於圖古哩克等處據守又扎那噶爾布屬人

濟爾噶勒擊獲克什木等遣往額林哈畢爾噶送信之台吉納旺
解送前來詢稱八月二十三日宰桑克什木搶臺站二十四日將
軍大臣等帶兵向崆吉斯行走二十九日克什木敦多克曼集烏
克圖圖布慎巴朗及喇嘛回人等前至烏蘭庫圖勒圍住將軍大
臣班將軍鄂參贊俱自盡薩將軍帶達什達瓦兵百人脫出後聞
爲錫克錫爾格所獲送往伊犁又稱哈丹帶兵至烏隴古尋阿睦
爾撒納並無蹤迹等語伏思納旺所供恐係揚言煽惑自應帶兵
速進擬卽日往會諾爾布琳沁共商進剿諭軍機大臣等策楞奏
擒獲台吉納旺所供伊犁情形並輕騎往會諾爾布琳沁商議進
剿所辦俱合機宜策楞會同諾爾布琳沁時卽將阿巴噶斯哈丹
遊牧奮勇勦捕其牲隻分給兵丁老弱賞給諾爾布琳沁此際更
宜偵探阿睦爾撒納如前至伊犁策楞等卽拒守要害候北路大

兵與噶勒藏多爾濟到時併力進剿若逆賊尙無蹤迹策楞等卽整頓兵力直抵伊犁剿捕賊黨然亦須量力前進不可輕忽前因未得伊犁信息因令扎拉豐阿暫駐額林哈畢爾噶今事勢如此扎拉豐阿自應同哈達哈策楞玉保等前進其安撫遊牧辦理臺站各事宜著達爾黨阿雅爾哈善帶兵繼進以作聲援富德仍遵前旨巡查臺站策楞並傳諭諾爾布琳沁伊少年奮勉朕甚嘉悅已封爲郡王此次進剿有功必加重賞扎那噶爾布亦知奮勉著封爲貝勒賜雙眼翎擒獲納旺之濟爾噶勒賞給孔雀翎並銀五十兩嗣後有應行加賞者策楞卽酌量賞給策楞自知前謫勇往任事著給與都統職銜仍以參贊大臣行走並傳諭扎拉豐阿知之○諭昨玉保奏中途出痘之宰桑哈薩克錫喇吞圖布等留於臺站照看仍帶鄂勒哲依等起程今至努空西喇臺站鄂勒哲依

鄂哲特亦皆出痘玉保先行留烏勒登在途照看等語聞伊等痘疹輕稀自易痊好且嗣後來京更無他慮益覺可喜著加恩賞給鄂勒哲依哈薩克錫喇騎都尉世職恩克博羅特吞圖布鄂哲特雲騎尉世職聽伊等指出子弟承襲此際須寬心調養俟全愈後從容行走勿稍勉強烏勒登善爲照看頗知悔過奮勉著授爲頭等侍衛仍將各宰桑等身體平復日期速爲奏聞○大學士管陝甘總督黃廷桂奏臣途次據布政使武忱稟稱劉統勳行文調取營馬並令各州縣採買馬駝臣思陝甘驛站額馬頗多除沿邊衝驛外其餘各驛十調其五六可得馬千數百匹較採購更速已咨撫臣台桂吳達善選解臣見加站赴京得旨甚屬可嘉此方係實心爲國之大臣所爲也○癸亥撥運湖南倉米十萬石於江蘇備賑○乙丑諭軍機大臣等策楞奏稱塔爾巴哈沁台吉唐古忒遣

幸桑鄂羅斯率五百餘戶來歸並將臺站被掠之察哈爾喀爾喀等送回等語唐古忒誠悃可嘉著加恩封爲貝勒賞給雙眼劍策楞俟伊來見時卽傳旨獎諭再台吉額琳沁從前阿睦爾撒納曾殺害伊子外雖相依心必不合唐古忒若能通信額琳沁俾擒獲逆賊不但藉復前仇更使身邀恩賞如力不能辦卽令其束手來京亦當施恩封賞策楞將此傳諭唐古忒令其盡心辦理以期承受朕恩如通信額琳沁時其書詞大指告以阿睦爾撒納與阿布賚久相和好而額琳沁從哈薩克逃出時曾傷害多人阿布賚甚懷憤恨今阿睦爾撒納欲將額琳沁擒送哈薩克以修好此係詢問和碩特台吉納噶察所告之詞其言必非無據額琳沁自知與阿睦爾撒納有隙且與哈薩克不和伊亦閱歷有年豈不豫防禍害若令其將阿睦爾撒納擒擊既可復仇免患且可承受恩賞策

楞卽傳諭唐古忒將此意作書開導額琳沁並將唐古忒言語情
形奏聞再見在軍前新附頗多兵勢自當振作若得阿睦爾撒納
未往伊犁之實信卽可速行進剿蓋以噶勒藏多爾濟與恩克博
羅特等頗重待喇嘛若會同進兵將助惡喇嘛擒剿恐伊等拘泥
習俗少覺掣肘惟於未到時能先示懲創庶合事機又如辦理喇
嘛一事昨命全行剿滅今思蒙古厄魯特俱重黃教亦宜分別辦
理如實係助惡臨陣仍復抗拒自當誅戮其擒獲者俱解送來京
老弱量從寬宥並將喇嘛係出家人不守清規好亂生事是以特
爲整頓明白曉示俾眾共知其罪無可遁並傳諭扎拉豐阿玉保
知之○丙寅諭軍機大臣等朕前降旨令哈達哈帶兵會合西路
今思北路厄魯特遊牧及新降汗哈屯烏梁海等旣須彈壓烏里
雅蘇台存貯糧石甚多亦應防守西路旣有兵六千見須豫備馬

駝自不便更加籌辦哈達哈等所領兵三千名應仍留北路惟令達爾黨阿帶兵一千或數百名同噶勒藏多爾濟前往西路合之扎拉豐阿玉保富德等陸續帶往兵丁八百名統計西路兵已及八千名足敷調遣惟馬匹最宜多備若將哈達哈等所謂翁金達什和碩阿西克托里等處馬匹挑選二三千由相近岔道解往應用更屬有益如繞道遠行亦可不必哈達哈仍遵前旨於北路駐紮以作聲援並令喀喇巴圖魯阿玉錫丹津帶領精兵千名以內前行哨探如遇阿逆由北路逃遁卽相機剿捕如此兩路進兵較爲周密哈達哈旣專辦北路卽掌定邊左副將軍印雅爾哈善在參贊大臣上行走達爾黨阿往西路時掌定邊右副將軍印若薩喇爾前來卽行移交仍在參贊大臣上行走其烏里雅蘇台大臣印著阿蘭泰管理伊等務公同商酌隨宜辦理勿但知奉行成命

以副委任○又諭達什達瓦之妻因伊犁擾亂並不聽從彼處眾喇嘛等之言帶領遊牧人眾前來投順誠悃可嘉著封授車臣默爾根哈屯名號派副都統鄂實齋雜蟒段十疋銀五百兩茶葉一千斤前往賞賚鄂實至巴里坤後卽赴扎拉豐阿處隨同辦事在領隊大臣上行走

十一月庚午朔晉封扎薩克輔國公額敏和卓爲鎮國公○辛未諭軍機大臣等汗哈屯烏梁海等報稱阿睦爾撒納誘伊等同來侵擾蒙古明係揚言以聳聽聞然或揣度西路進兵北路無備前來滋擾亦未可定宜先時設備使叛賊不得逞其詭計哈達哈等見領兵三千名此外烏里雅蘇台兵丁甚多米糧亦甚豐裕著合爲一萬分駐烏里雅蘇台軍營及哈達哈等所據形勝之處以爲聲援第以豫備進兵爲言不必宣露防禦阿逆前來之意使賊聞

風退避再杜爾伯特貝勒色布騰與阿睦爾撒納有仇前在軍營行走頗著勞績仍命爲參贊大臣前往北路軍營協辦事務一應事宜哈達哈等與伊公同商議奏摺內一體列名至添兵豫備之處未經諭色布騰知悉哈達哈等亦不必轉諭此非疑伊恐其屬人漏洩於事無益著密諭哈達哈等知之○癸酉諭軍機大臣等據策楞奏稱喀爾喀貝勒車木楚克扎布台吉唐古忒宰桑鄂爾奇木濟將叛逆宰桑敦多克曼集鄂拓克之得木齊沙喇勒岱等五得沁遊牧剿滅扎那噶爾布諾爾布琳沁又將布庫努特三得沁遊牧盡行殺戮等語此次辦理俱甚妥協見在領兵前進務期擒獲阿巴噶斯哈丹等解京治罪並將伊遊牧剿滅以振軍威此時兵力甚盛策楞卽會同諾爾布琳沁扎那噶爾布唐古忒等進取伊犁如阿睦爾撒納已據伊犁恐兵力不足仍遵前旨俟噶勒

藏多爾濟等到時整頓大兵同進斷不可冒昧輕試至唐古忒自伊犁力戰而出理應加恩恐眾人不知妄思恩澤著策楞派侍衛一員至伊遊牧傳諭加恩卽從巴里坤支銀一千兩賞給所有勦滅布庫努特之受傷人員並著策楞酌賞以示鼓勵仍咨部議敘侍衛滿楚所稟豫報阿睦爾撒納謀叛之伊犁回人策楞到彼卽查明賞賚策楞自知前譴奮往從事悉協機宜額林哈畢爾噶等處共知其爲將軍不便更替著卽授爲內大臣兼定西將軍扎拉豐阿著授爲定邊右副將軍卽將達爾黨阿帶往之印給與掌管駐紮額林哈畢爾噶辦理軍務達爾黨阿著授爲參贊大臣同伊辦事王保隨將軍策楞帶兵前進伊等同心協力擒勦逆賊投捕黨與總期於事有濟共奏膚功無將軍參贊之分策楞等其仰體朕意以副委任策楞著加恩賞銀一千兩伊子特通額已施恩免

罪授爲三等侍衛並著隨往軍前效力○諭前因阿睦爾撒納宰桑阿穆爾濟爾噶勒告稱班第薩喇爾參奏阿睦爾撒納之時青滾雜卜私告阿睦爾撒納以致潛逃朕因降旨拏問令其質對今阿穆爾濟爾噶勒已經正法無從質對卽青滾雜卜果有此事亦不過一時愚昧伊因與阿逆同在一處恐一併參處私相告語初不料阿睦爾撒納之奸惡至於此極也卽如色布騰巴勒珠爾信阿睦爾撒納之言代爲陳奏色布騰巴勒珠爾豈有附逆之事此皆伊等不知事體受其愚弄耳青滾雜卜自去年領兵以來甚屬奮勉從前罪愆著加恩寬免伊能感戴朕恩勿稍疑懼益加奮勉朕尙將施恩封爲親王此際如已拏問卽著傳旨釋放如未拏問卽可無庸辦理將此傳諭哈達哈知之○甲戌諭軍機大臣等鄂勒哲依哈薩克錫喇尼瑪吞圖布恩克博羅特等已俱命前往西

路軍營聽候調遣鄂勒哲依哈薩克錫喇著授爲參贊大臣尼瑪
授爲內大臣兼圖什墨勒仍授爲參贊大臣吞圖布恩克博羅特
俱著在領隊大臣上行走策楞進兵之時扎拉豐阿達爾黨阿在
額林哈畢爾噶駐紮辦理軍務尼瑪著卽在扎拉豐阿處管理臺
站稽察奸細遇奏事時參贊大臣等俱著一體列名○諭據策楞
奏稱諾爾布琳沁派出兵二千名合之見在帶往兵丁共計四千
足以勦滅阿巴噶斯哈丹等但聞阿巴噶斯等遷往伊犁見派索
倫兵丁前行哨探大兵暫住烏嚕木齊候信辦理等語阿巴噶斯
哈丹聞我兵前進而台吉諾爾布琳沁又帶兵會合聞風遠遁遷
往伊犁情形屬實然伊等帶領戶口勢必不能遄行若由徑路發
兵堵截必易擒獲儻至伊犁後賊勢會聚轉來抗拒亦未可定應
曉諭諾爾布琳沁等阿巴噶斯哈丹雖畏威遠去略得安息卽將

窺竊汝等遊牧須及時剿滅以杜後患如已入伊犁毋庸過急俟噶勒藏多爾濟等到時會同前進方爲妥協再策楞駐兵烏嚕木齊與回人遊牧相近或賊人暗生奸計誘令回人等不行換給官兵口糧或借換給口糧之時乘閒擾亂策楞應密行防範至諾爾布琳沁等宰桑台吉感恩奮勉派兵隨征每兵著賞銀三兩以示鼓勵○乙亥諭軍機大臣等據達爾黨阿哈達哈等奏稱聞西路大兵一切俱已整備於明歲草萌時再行進發等語此奏甚屬錯誤昨命達爾黨阿領兵前往西路哈達哈留於北路駐紮因北路地勢空曠俱無遊牧不若西路之便隨時可以進兵屢經明白傳諭計達爾黨阿領兵至西路時噶勒藏多爾濟等亦陸續可到一切會同商酌速奏膚功方合機宜見在冬令進兵較難人人所知卽爾等亦不無所見然愈遲緩則賊黨愈固賊力愈強辦理更費

周章所謂兵貴神速者此也以冬令進兵爲難將軍大臣尙因此
退縮何以鼓士氣而振戎行卽如台吉沙克都爾曼濟宰桑鄂勒
哲依等伊部落與伊犁密邇今伊犁信息未通伊等尙奮往前進
若噶勒藏多爾濟之部落業已保護一聞此語勢必退後又將何
以集事此時惟馬匹急宜籌畫策楞扎拉豐阿玉保等卽倣照木
蘭行圍時向蒙古換馬之法通融辦理以疲乏馬匹換易肥壯馬
匹酌量給以段疋銀兩此項疲乏之馬善爲牧放轉瞬卽成臆壯
是不但無損於彼而且大有裨益噶勒藏多爾濟等部落馬匹照
此交易諒無不欣然樂從且今歲春閒進兵阿睦爾撒納屢次陳
奏以迅速爲善瑪木特亦以爲然儻我兵緩行前進真不出叛賊
所料而賊愈得以逞其負固抗拒之力矣明歲進兵之言西路軍
營諸臣並未陳奏達爾黨阿至西路時亦出此言必至搖惑軍心

所關非細斷不姑貸見在沙克都爾曼濟鄂勒哲依等已至西路如何商議進兵之處策楞等速行奏聞○丁丑諭軍機大臣等據策楞奏稱布魯古特台吉諾海奇齊克呼爾璘台吉薩喇勒自伊犁前來告稱阿睦爾撒納未至伊犁彼地欲內附者甚眾等語看來與阿逆黨惡者不過阿巴噶斯哈丹烏勒木濟敦多克曼集約蘇圖克什木圖布慎錫克錫爾格巴蘇泰等數人卽阿逆亦自知伊犁眾心離散疑懼未往若於叛賊未至之前速行進兵眾必迎降策楞此時想已將阿巴噶斯哈丹部落剿滅賊眾自必畏懼其馬匹牲畜分給兵眾以益兵力速卽進兵卽可平定噶勒藏多爾濟等陸續將到策楞俟其到時會合進兵直入伊犁固屬甚善但時不可失惟在相機辦理毋庸過於拘泥賊黨烏勒木濟等罪不容誅斷難寬貸卽前來投降亦擊解來京治罪其戶口人等盡行

勦滅以示懲創惟伊犁附近有喇嘛六千餘人若一體辦理不但失眾蒙古之心其真偽亦無區別策楞務加體察其實係聚眾黨惡者卽行誅戮如係威逼相從量從寬免一切俱遵前旨辦理諾海奇齊克薩喇勒自伊犁前來輸誠相告甚屬可嘉昨諾海奇齊克之弟琿齊薩喇勒之兄鄂勒椿弟洪郭爾等入覲時已施恩俱封爲扎薩克台吉今特加恩封諾海奇齊克爲公薩喇勒爲扎薩克頭等台吉伊等果能奮勉效力朕必更加恩重賞著策楞傳諭伊等知之○壬午調鄂樂舜爲山東巡撫以高晉爲安徽巡撫託庸爲安徽布政使

原任杭州織造

○以李侍堯署廣州將軍五福爲戶部

右侍郎

由副都統遷

○癸未諭前因準噶爾夷部數年以來襲奪頻仍

所屬諸部率眾內嚮接踵而至朕爲天下共主旣不忍拒而不納將爲之經理遊牧卽因其地處之爲長久計而兩朝未竟之緒

亦乘此事機一勞永逸此用兵之本意也至達瓦齊之立爲台吉不過外夷自相篡竊原可不必聲罪致討從前所降諭旨甚明但以達瓦齊進貢請安尙居然以噶爾丹策零自處是以降敕切責旋復遣使叩關情詞恭順則大軍已入其境未得至京將軍等取其書奏之及王師進取伊犁伊犁畏避逃竄亦情理所有是達瓦齊原無獲罪於天朝之處伊之殘酷暴虐亦皆出阿睦爾撒納之口迨俘獲來京視之則一庸懦可憫之人耳且言久思歸順特以阿睦爾撒納領兵前往實不便於其軍前納款此其肝膈本懷非由飾說古者異國降王或優以封爵示無外也達瓦齊著加恩封爲親王賜第京師奉朝請朕撫馭萬國一秉大公仁育義正惟聽人之自取可將此宣示達瓦齊並曉諭中外知之○諭軍機大臣等朕已將達瓦齊宥罪施恩封爲親王賜第京師帶領伊子居住伊

舊日屬人著查出四五十戶令其來京役使並著策楞曉諭台吉噶勒藏多爾濟等及準噶爾人眾從前進兵擒拏達瓦齊止因阿睦爾撒納想其暴戾無狀陵虐準夷朕軫念羣生拯救水火是以聲罪致討今拏解來京乃一庸愚無用之人卽伊種種虐行其初亦皆係阿睦爾撒納從中相助非伊一人之罪且達瓦齊原係綽羅斯台吉朕憐憫其愚備灌京邸斷不令回至遊牧見在達瓦齊感戴朕恩思圖報效繕寫書信寄伊親信之庫本諾雅特台吉諾爾布杜爾伯特台吉伯什阿噶什宰桑約蘇圖車凌多爾濟等令其協擒阿逆以彰國法具見誠惻著策楞卽行轉交仍將伊等接到達瓦齊書信後言語情形速行奏聞並傳諭納穆扎爾舒明等將用兵準夷及加恩達瓦齊之處宣諭車凌齊木庫爾等知之○

乙酉

嘉貴妃薨命追封爲

皇貴妃○諭軍機大臣等據策楞

奏鄂齊爾圖等所供都噶爾克什木敦多克曼集巴蘇泰等竊踞伊犁肆行擾害情罪可惡策楞帶兵進剿務期斬獲儻就擒時卽派幹員解送來京治罪妻孥悉行誅戮其喀爾喀王貝勒等隨將軍等駐紮伊犁者尙多策楞訪聞查出卽明白傳旨曉諭伊等各遇寇賊兵少受困朕心甚爲軫念今大兵已抵伊犁卽令伊等各回游牧休息以示體恤至所奏剿滅阿巴噶斯後卽帶兵速赴伊犁辦理固屬奮往但不可不慎重仍遵前旨偵探阿逆如已據伊犁候噶勒藏多爾濟到時會合前進方爲妥協○丙戌冊諡嘉皇貴妃爲嘉淑皇貴妃○丁亥諭從前平定伊犁時投誠之台吉宰桑等班第等若能因其求見開誠曉諭有應鼓勵者奏聞加恩則新附之人傾心悅服遇事無不陳告不但地方情形人情向背皆可周知卽伊等可信與否亦得以灼見聞班第在彼惟辦理

陳奏事件不與伊等接見又與鄂容安意見不睦以致爲賊所困
今策楞前往當以前事爲鑒遇沿途投誠厄魯特等卽與接見庶
可以通其情而資其力將軍大臣惟在集思廣益甯輯邊疆方爲
無負任使若陳奏事件自有司員承辦卽稍有遲誤亦屬可原至
在事大臣等俱係朕信用之人理應和衷共濟屏除一切意見爲
國家效力宣猷設彼此互相猜疑不特於公事無益甯不貽笑於
厄魯特耶卽如見往軍營之鄂勒哲依哈薩克錫喇尼瑪等雖係
新降之人旣同在一處亦應虛衷商酌使伊等各抒所見以期集
事策楞前在伊犁目擊班第等情形此時務宜遵旨悉力妥辦毋
蹈前轍再前遣尼瑪駐額林哈畢爾噶查辦臺站今伊抵巴里坤
領兵前進奮往可嘉寄到佩用荷包及鼻煙壺二件著傳旨頒賜
尼瑪不必駐紮額林哈畢爾噶卽同策楞領兵前進其所派管理

臺站事務策楞於所知台吉或噶勒藏多爾濟屬下宰桑內選派一二員隨同富德管理○庚寅達爾黨阿等奏親王成衮扎布等追剿包沁叛眾至烏隴古之扎克鄂博地方將肯哲顏達什巴雅爾圖薩喀及伊等妻孥盡行剿滅計殺三百餘人俘四百餘口效力人員請交部議敘報聞○甲午噶勒雜特得木齊丹畢率屬來降○乙未諭軍機大臣等據烏勒登奏到鄂勒哲依哈薩克錫喇等陳奏托忒字本章命達瓦齊閱看據稱由闡勒奇博羅布爾噶蘇珠勒都斯進兵山嶺皆大此三處內惟珠勒都斯地方空虛並無阻攔可寄知策楞拏獲哈丹阿巴噶斯後阿睦爾撒納若不在伊犁不論如何進發皆可若在伊犁我兵整頓之後與噶勒藏多爾濟等眾台吉鄂勒哲依等眾宰桑公同商議果由珠勒都斯進發妥便卽由彼進發直抵伊犁但不可令賊偵知設備仍揚言由

博羅布爾噶蘇前進將無關輕重之兵虛作聲勢令其力分於彼我之大兵掩其不備尤易成功可否如此辦理之處策楞等惟宜相度機宜亦不必拘泥論旨○丁酉諭軍機大臣等據舒明奏稱貝勒色布騰遵旨帶二十餘人馳赴軍營等語色布騰自投誠以來奮勉效力春間進兵頗著勞績今一聞朕旨卽帶兵馳赴軍前急公任事誠可嘉予著賞給郡王品級若能更立殊勳朕當加以重賞見在擒拏叛賊俱由西路進兵北路尙無所事惟今年收服之汗哈屯烏梁海等及陸續來降之輝特人眾其中尙不可全信應加防範著色布騰留心查察不必宣露再色布騰抵軍營後協同哈達哈等辦事並無馳驅之處其戶口俱著帶往居住所有陳奏事件准其列名在桑寨多爾濟成衮扎布之後雅爾哈善之前○諭杜爾伯特汗車凌之婿台吉達瑪林率眾來歸著照所請歸

於車凌遊牧同居達瑪林著加恩封爲扎薩克台吉加賞段六疋並著舒明查明伊戶口內如須賞給口糧卽奏聞賞給

十二月辛丑命安徽折賑米價每石加銀二錢○壬寅諭軍機大臣等台柱奏報永常在臨瀆病故一摺甚不明晰該撫旣據參領等稟報卽應親往看視乃僅以奏聞了事糊塗已極永常係領兵大臣貽誤軍務將來拏到之日法在必伸非尋常要犯可比乃竟猝然報故其中必有別情已經降旨著阿里衮馳驛前往詳加相驗所有押解來京之參領阿三泰著革職拏問交阿里衮帶同滿兵四名著乾清門侍衛前後隔別拏解來京其自西安管押之參將羅佳雄守備李瑾並知縣伍錦談恕行俱著該撫卽行嚴拏選差幹員分起解交刑部從重審擬儻有一名狡脫畏罪自戕情弊惟該撫是問台柱所查情節若何卽著速奏○癸卯諭軍機大臣

等據端濟布奏稱噶勒藏多爾濟沙克都爾曼濟巴雅爾等公同商議請於明年正月進兵並寄信額琳沁及招降伊犁眾喇嘛等令其擒賊自效伊等悉心籌畫實堪嘉予卽照所請於明年正月內進兵但歲內必須將阿巴噶斯等剿滅不使伊等聞風逃竄昨已傳諭策楞著仍遵前旨辦理噶勒藏多爾濟議遣人曉諭宰桑錫克錫爾格令其招降伊等眾喇嘛等卽著派侍衛一員同往眾喇嘛處傳諭錫克錫爾格旣爲噶勒藏多爾濟等素知信其非真心從賊自可寬宥以期後效至於圖布慎克什木敦多克曼集輩情罪可惡必當明正典刑以彰國法此番伊犁擾亂半由彼處喇嘛等從中助惡前曾降旨令將伊等盡行剿戮繼思蒙古人尊奉黃教且其中亦當示以區別先後諭旨甚明今觀噶勒藏多爾濟等令遣人招降眾喇嘛其心事顯然可見策楞到彼應將喇嘛中

起意倡亂之人卽行正法其情罪稍有可原者量從寬典並商同噶勒藏多爾濟等分別妥辦今雖僉議於正月內進兵若勦滅阿巴噶斯等遊牧及收服烏魯特克喀特等時機會可乘勢不宜緩卽當奮勇前進亦毋庸過於拘泥兵貴神速惟在相機辦理噶勒藏多爾濟等僕僕道途若已定於明年進兵伊等遊牧甚近不必令其守候軍營應暫行遣回俾得休息俟至期約會同進並著策楞傳諭伊等知之○甲辰諭向來由各部院司員補授御史者原有准該堂官奏請仍兼部務之例後經定議停止但御史雖職司稽察而事務簡少且既經保送考選必係尙能辦事之員嗣後郎中等官補授御史如有諳練部務者仍准各該堂官奏請引見朕酌量令其兼管著爲例○命傳諭烏魯特宰桑錫克錫爾格曰比年準夷不靖擾害羣生朕爲天下共主發兵拯救既定伊犁俾安

衽席詎意阿睦爾撒納背恩叛逆煽惑眾部是用再申天討以昭國法爾與阿逆素非同謀且宿有仇隙在擾亂之頃勢力不敵勉強服從已爲朕所洞鑒近聞逆黨約蘇圖等知副將軍薩喇爾陷入爾部爭相索取爾並不遣送其非黨惡同謀於此益信爾誠能感戴朕恩擒獲阿睦爾撒納並助惡之約蘇圖敦多克曼集克什木等朕必加爾厚恩或力弱不能禦賊卽帶領薩喇爾會同大兵前進奮勉自效○召台柱來京以盧焯署陝西巡撫

由鴻臚寺少卿署

○

丙午王保奏拏獲自伊犁前來克喀特宰桑巴桑之弟普爾普據稱阿睦爾撒納領兵千餘名在博囉塔拉另給兵千名令巴特瑪車凌額琳沁等往掠諾爾布琳沁遊牧伊犁喇嘛及宰桑烏克圖錫克錫爾格巴顏巴桑等議擒獻贖罪於十月二十五日集兵圍勒奇嶺遣人送信防備等語見將普爾普解令諾爾布琳沁詢問

諭軍機大臣等據王保奏稱所獲普爾普告知伊犁喇嘛等見在
集兵擒獻阿逆以贖前罪等語準噶爾人等原屬反覆無常然尙
知利害從前阿睦爾撒納詭言四衛拉特人眾皆其羽翼眾人不
審虛實懼伊勢力脅從作亂後知諾爾布琳沁出兵擊賊而北路
發兵先遮賊人遊牧不獲逃竄復勦滅包沁人等西路又將布庫
努特等誅戮伊等聞風畏懼旋即知悔今伊犁喇嘛等知逆賊力
不可恃共圖擒獻以贖前罪此非出於飾說乘此機會策楞等即
應領兵直入責令伊等擒賊自效誅滅黨惡寬其脅從其勢更易
且噶勒藏多爾濟等皆係該處大台吉其舊日屬人自必聞風來
歸可以資其兵力若普爾普所稱阿逆派兵千名遣巴特瑪車凌
等擄掠諾爾布琳沁之語尙非實情不過伊等欲聯絡諾爾布琳
沁之意如果前來則大兵以逸待勞會同諾爾布琳沁奮力勦滅

賊勢從此益孤更可計日就獲見在降旨傳諭伊犁喇嘛等令其效力贖罪著加恩授普爾普爲三等侍衛賞銀五十兩並派侍衛一員同伊前往伊犁宣旨曉諭○諭和起豆斌因從前辦理馬匹遲誤經部議革職仍留軍營效力行走本應如所議革職第念和起等此次辦理軍營糧餉馬匹尙屬無誤著免其革職從寬留任伊等邀恩寬宥宜益加意辦理儻再有貽誤斷不寬貸○命嚴定命案失入處分○丁未命侍郎劉綸往浙江查辦前任巡撫鄂樂舜勒派商銀案並查閱江南浙江賑務○戊申諭阿睦爾撒納本一姦詭狡惡之人因數年來準噶爾部落篡奪相尋希圖吞噬而準噶爾台吉乃綽羅斯世傳伊係輝特勢不能遽行竊踞遂以達瓦齊爲奇貨誘助攻殺伊得從中取事及達瓦齊旣爲台吉不遂所欲乃率眾來降彼時策楞舒赫德議留其丁壯於軍營而老幼

婦女悉於歸化城安置朕爲天下共主彼以窮蹙來歸而轉令其
妻子離散實所不忍且伊擁眾數千戶同來亦斷不肯聽其離拆
勢必四出劫掠其爲害於喀爾喀者甚大是以治策楞舒赫德之
罪而召見阿睦爾撒納於熱河行在錫之封賞伊卽向陳平定準
噶爾方略準噶爾一事乃我 皇祖 皇考屢申撻伐未竟之緒
本所當辦今旣機有可乘自不容已而以夷攻夷非卽用伊爲先
導不可是以卽用伊爲將軍然朕已早燭其未可深信故令額駙
色布騰巴勒珠爾與之同行密降諭旨阿睦爾撒納若實心出力
可與之事權以誠感之若有反叛之狀則汝收將軍印便宜行事
伊旣向化而來朕惟開誠布公實心相待加以厚恩伊亦人類甯
不知感此上蒼所鑒臨初非術馭之利結之逆詐而豫圖之也迨
伊犁旣定朕降旨封四衛拉特爲四汗伊遂潛懷逆謀欲併據準

噶爾遣人至哈薩克揚言伊領兵平定伊犁而不云天朝大兵又託言哈薩克人眾謂非令伊爲總台吉不可私調兵數千置將軍印不用用準噶爾台吉私印植黨修怨殘殺自恣六月內班第等具以奏聞朕卽降旨令其卽軍中拏問治罪班第等旋奏伊將遵旨入覲朕召軍機大臣示以所奏機宜皆謂阿睦爾撒納自必前來瞻仰或慮其回巢後滋生事端耳而朕卽豫料其必不前來是以復令班第等卽於彼中相機從事若已起身在旬日內必當追回迅速拏問蓋伊旣懷叵測卽詐稱入覲亦必於途次遷延若不早爲完結必致生變與其俟伊交結煽動變遲而費大何如及時乘機辦理之爲得也乃班第等奏稱已遵旨遣人追取適有哈薩克使者同行恐其驚疑復將追取之人撤回獨不思哈薩克自大兵平定伊犁卽屢次遣使至營本極恭順且深悉阿睦爾撒納之

反覆狡詐果正其罪亦何妨明切曉諭示以天討彼何驚疑之有此班第等不能遵旨辦理自失機宜之大端也朕見班第等不能在外完結卽料其至伊遊牧地方必且竄匿逋誅潛取家屬因降旨烏里雅蘇台軍營大臣等令於撤回滿洲索倫兵內截留一千名往禦而阿睦爾撒納果密使心腹邀其妻子剋期奔會幸其所使班珠爾後期而我滿洲索倫兵已詰朝畢集遮留其妻子部眾無一人闌出者班珠爾等伎倆旣窮始束身入覲仍計同時劫之以去此朕於熱河親訊時據班珠爾等一一供吐者若朕不豫爲部署彼之家屬人眾將安然遠颺豈不增其羽翼耶額琳沁多爾濟我之扎薩克親王班第等以其老成可任令與阿睦爾撒納同行乃齊木庫爾旣密告其弟逆謀已著速當擒戮而恬不知警但答以我單親王彼雙親王不敢便宜從事夫旣爲國家叛賊尙何

雙親王之足論及阿睦爾撒納繳授將軍印信令伊先行尙不覺悟逾日乃知其遁去始以兵追捕而已無及矣此又自失機宜之一大端也班第鄂容安薩喇爾駐紮伊犁受心膂之寄當聯爲一體乃班第爲人過於謹慎氣局狹小好親細事鄂容安雖尙知大體而不能通蒙古語一應機密籌畫未能洞悉頗有漢人習氣至薩喇爾之在準噶爾譬之內地王府長史護衛者流耳今雖授以顯秩彼眾原所不服而伊復蠱率自大三人者性習各殊安望其能和衷共濟重以阿睦爾撒納之奸其所不悅盡遣入朝三臣之左右皆其黨與三臣深信不疑疏於自衛兵散處馬遠牧緩急無應而軍營金帛茶布以備賞賚者頗充裕夷眾耽耽以視而班第等初不介意卽如敦多克曼集乃阿睦爾撒納所信用班第等一聞搶掠臺站之信卽應立爲擒戮以翦其爪牙乃轉令傳諭喇嘛

安撫夷眾敦多克曼集因得招集羣兇操戈相向三臣倉卒衝突
賊眾大集勢不能支班第鄂容安捐軀以殉薩喇爾被執設班第
鄂容安見機明決早爲之所安得至此此二臣之殞命種種皆由
自誤無所歸咎而朕用人失當自誤亦無可辭也所可異者阿睦
爾撒納之狂悖情形色布騰巴勒珠爾在軍營時皆所深悉且曾
受朕密旨防範者乃毫不加察反爲其所愚與班第等如水火朕
是以命其來京乃在朕前仍無一言奏及伊親爲額駙位列藩王
豈其與逆豎同謀實可信其必無是理特年少無知初不料其至
此也至永常以領兵大臣駐守烏嚕木齊聞臺站被掠初以爲窮
夷自相攻劫奏到帶兵追逐意尙近於勇往卽加內大臣銜以示
鼓勵及聞阿睦爾撒納逃叛輒畏蕙乖張甘心僨事退回巴里坤
而置伊犁於度外設令永常當業克明安宰桑扎木參等叩轅請

告之時厲兵迅往諸部得所依倚協力搜捕阿睦爾撒納子身遁
軼可計日就擒西陲已早安帖無事如北路之殲滅包沁是其明
驗也若以爲臺站已斷難於前進則見在策楞與噶勒藏多爾濟
之子諾爾布琳沁又何能以偏師深入振我軍威而伊犁之喇嘛
宰桑等皆聞風內嚮悔懼自新願率眾追捕叛逆以贖其罪耶策
楞旣能奮勉以蓋前愆爰授以定西將軍而永常之罪不容誅今
雖死於道路亦當明正典刑總之此事諸臣昧於機宜節節貽誤
然其中蓋有天意何則朕思阿睦爾撒納雖傾險反側但當伊犁
甫定眾或以其爲國宣勞而一切罪狀惟軍營大臣見之朕及軍
機大臣等知之天下後世不盡知之也又設使其遵旨入覲朕爲
久遠計不欲宣播其奸拏問治罪然無知者猶將有烏盡弓藏之
議是今日之逆迹顯露使人人知其必不可不誅未必非上蒼之

默啓之也人情樂於觀成難於謀始上年定議用兵舉朝率多疑議今伊犁平定則以爲事出意外聞阿睦爾撒納負恩逃叛又以爲究不可辦且以爲此固當然今聞伊犁宰桑悔罪擒賊或又以爲恐未必然人心風俗一何怯懦至此此朕所以愧且懼也班第鄂容安見危授命固爲可憫然於事無補迴非傅清拉布敦之殞身西藏爲國除兇者可同年而語然一死已足自贖班第誠勇公爵仍著加恩令伊子巴祿承襲鄂容安襲勤伯爵著該旗帶領伊子引見令其承襲朕於軍國重務一本大公隨機順應順者嘉與之逆者誅討之奮勇者獎勵之怯懦者罰殛之惟準乎事理之至當初非窮兵勤遠亦不至耗財重費合計見在軍需較之雍正年間所費不及六之一而偏災賑恤與夫中外賞賚初未因軍興稍有裁損此王公大臣等所共知者彼妄生異議者誠何心耶用將

此事顛末並在事諸臣功罪宣諭中外知之前後諭旨及軍營奏報諸摺並摘發○命伊犁本年貢賦加恩寬免自明年爲始永免原納貢賦之半○庚戌以策楞爲領侍衛內大臣○以傅森爲兵部尙書由吉林將軍遷○壬子戶部議准直隸總督方觀承奏順天府屬東路同知所轄州縣均隸通永道兼轄惟大興香河二縣隸霸昌道道廳統轄不一遇彙覈案件未便請將大興縣歸西路同知專管統隸霸昌道香河縣歸東路同知專管改隸通永道從之○甲寅定旗奴告主擬徒不准折枷例○丙辰駐紮巴里坤辦事大臣和起等奏十二月初五日副將軍薩喇爾遣伊兄布林及察哈爾藍翎侍衛納木扎勒等帶領和碩特台吉諾爾布敦多克來使鄂爾奇木濟烏魯特來使鄂斯庫綽和爾來使韋納克克喀特來使齊木伯勒和碩特台吉圖們來使烏特巴拉等五人至巴里坤告

稱八月二十四日克什木等作亂薩喇爾及布林等力戰將軍班第尙書鄂容安至哈斯河察罕白新地方被宰桑巴桑圍困力竭自盡薩喇爾衝走二十六日夜至崆吉斯河爲錫克錫爾格所執看守六十日後準噶爾台吉宰桑喇嘛等自知罪愆議擒賊自效見聞阿睦爾撒納同台吉額琳沁舍楞在博羅塔拉道都托羅亥地方居住各領兵往擒薩喇爾同公丹拜藍翎侍衛和通鄂勤宰桑約蘇圖錫克錫爾格巴桑等帶兵三千餘名由博羅布爾噶蘇進台吉諾爾布貝奇宰桑烏克圖等帶兵三千餘名由闊勒奇嶺進於十一月初九日會集托和木圖俟擒獲賊首交薩喇爾解送各遣人齎準噶爾喇嘛等奏書前來並請入覲等語臣卽將布林等及來使五人派員馳送京師諭軍機大臣等和起等奏薩喇爾同準噶爾台吉宰桑等議擒阿睦爾撒納來獻等語薩喇爾駐紮

伊犁倉卒遇賊班第鄂容安捐軀盡節伊爲賊拘留自必愧恨然因兵少力弱中賊詭計非伊無能被執今伊感念重恩會同伊犁眾台吉宰桑等分路領兵期獻逆賊是其誠心奮勉終始不渝朕聞之實深嘉予轉復爲之惻然著策楞傳旨慰勞並將荷包鼻煙壺各一件俟薩喇爾至軍營時卽行頒賜其宰桑烏克圖等原係歸誠之人曾降旨給與職銜止因阿逆從中煽惑伊等勉強服從今旣悔罪輸誠擒賊自效俟拏獲阿逆後將伊等悉行寬宥並當從重施恩發往荷包鼻煙壺各十五件將見在效力之宰桑等徧行賞賜策楞等詳悉曉諭伊等知之○丁巳諭據和起等奏準噶爾台吉宰桑等公同商議於十一月初九日在托和木圖聚齊同薩喇爾領兵前往擒拏阿睦爾撒納並遣使五人赴京瞻仰等語薩喇爾原係厄魯特之人叩關投誠甫及五年隨圍出兵奔走幾

無甯歲前此命其同駐伊犁亦因伊熟於彼地情形耳及阿睦爾撒納背叛生變班第鄂容安捐軀盡節而薩喇爾衝陣突出其後力窮被執拘留所以不加深咎者誠以厄魯特風俗原不知致身大義未可以世受國恩之滿漢臣工相提並論初非朕之溺愛厄魯特而然也拘方之士或將謂三人同駐伊犁彼二臣臨危致命而乃覲顏就執其偷生負國斷難姑容如此則是以祖父世臣受恩深重明於大義者爲比未免過於求全責備而其視薩喇爾爲過高矣夫責人易而當局難平居議論誰則不能獨不思身當其境可深信其能引決就義如班第鄂容安之爲者恐亦未能多得也俟阿睦爾撒納擒獲之日朕自分別功罪另降諭旨恐無知之人但有所聞輒生異議並未深悉事理一味隨聲附和澆風陋習不可不亟爲挽回用特曉諭知之而起等摺並發○諭和碩特台

吉諾爾布敦多克奏稱伊父羅布藏車楞從前久欲投誠因在噶爾丹策零時未獲率眾前來今年進兵班珠爾又將伊屬下人等占據等語頃諾爾布敦多克之子鄂齊爾赴熱河入覲加恩封賞令同噶勒藏多爾濟等赴軍前效力今諾爾布敦多克會同薩喇爾領兵前拏阿睦爾撒納誠悃可嘉著施恩封諾爾布敦多克爲公所有班珠爾占據伊舊日屬人著策楞查明卽行給還○戊午諭軍機大臣等據策楞奏稱此時前往伊犁尙非急務大兵進發卽向博囉塔拉迎赴薩喇爾擒拏阿逆並將助惡人眾悉行剿滅等語所奏甚合機宜惟辦理助惡人等尙當示以區別如阿巴噶斯哈丹察袞德濟特敦多克曼集等固屬罪無可逭若巴特瑪車凌額琳沁二人甫從哈薩克前來且額琳沁素與阿逆積有讐隙或能協力擒賊更當格外寬宥至宰桑約蘇圖年幼無知不過爲

賊所誘前曾降旨令將鄂勒哲依哈薩克錫喇尼瑪約蘇圖俱授
爲圖什墨勒內大臣今約蘇圖已協同薩喇爾前往擒拏逆賊著
策楞卽傳旨補授其巴特瑪車凌等亦著到日詳察情形奏聞請
旨○諭齊木庫爾自歸誠以來感戴朕恩實心效力豫將阿逆謀
叛情形告知軍營大臣並率領輝特人眾內附誠惻可嘉是以施
恩封爲郡王今聞瀟逝深堪憫惻著賞銀一千兩料理喪事並加
恩將伊子車布登多爾濟承襲郡王兼管輝特盟長事務伊年幼
不能獨辦著授普爾普爲副盟長協同管轄○命盛京民閒典買
田畝永遠免稅○己未以裘曰修爲吏部右侍郎由中允遷○庚申
皇十三子永璟生○乙丑諭前據台柱奏報永常在臨潼縣病故
隨命尙書阿里衮馳驛前往驗視若畏罪自戕雖死於道路亦當
明正典刑今據阿里衮查驗實係因病致死詳悉體訪並無別情

永常之貽誤軍務固屬罪無可逭然既因病殞身倖逃國典姑免其顯戮所有伊子額騰額著發往拉林當差○諭軍機大臣等據扎拉豐阿奏稱噶勒藏多爾濟之子諾爾布琳沁於十二月初七日病故等語諾爾布琳沁年幼而甚奮勇前緣伊父入覲獨駐遊牧頗著勤勞是以加恩封爲郡王今聞病故深堪憫惻著賞銀一千兩用示優卹並傳諭噶勒藏多爾濟不必過於傷心此時若尙未同策楞帶兵前進暫令在遊牧休息俟料理伊子事畢再行續進○丙寅諭保舉堪勝知府記名人員未擢用者仍得保送○是歲朝鮮琉球來貢○會計天下民穀數各省通共大小男婦一萬八千五百六十一萬二千八百八十一名口各省通共存倉米穀三千二百九十六萬六千三百一石一斗二升九合六勺零